

Poriho Utipimo Kimo Kapiho

Korindihiyaapi Jipatipaisihore

Kimandi 2 Korindihiyaapi Utipimandapi Nesipihande

Poriho Epesaasihanda namasi noti yapipati Masetoniyahanda bimihi kinaungwiha naasaahi sanaihi 56 A.D. hura piwiha kima Poriho jipatipiyahaare. Aih i isihya usa komi piwiha jiha atisawaawi kiya nasenawaayopo. Kiya saiwi atiwi nehauhi Poriho atisataati gaare ndaase. Saiwa siyati owetihi ipoti Poriho Korindihiyai saiwi Autaahaatihomi isihya Jerusaremihandanda bimohiyihyai anditiwipi numwitaatiwihapaapi daihira nunjati kaundataase. Iyati ko Poriho piwiha ipotiha kaundati osasepihaati ami isihya Korindihiyaami usa Porihomi piwiha baiwi atiwi namepi pohipiyauhi kiyaapi apowih i itihindaase.

2 Korindihiyaapi Piwiha Napimasataise

Poriho isihyai gaahure undati ami piwiha namasati jipatipaisiha (1:1-11)

Poriho piwiha kataunjataati komi piwiha nahata gwiwunyahohiyihyaami maarihomi kaitandihiretapihaiwaapi kaundisiha (1:12-7:16)

Poriho kiyaapi piwiha ausaati kaundati nawihoh nahatiyaati ahoaiwi isihya Jerusaremihandanda bimohiyihyai anditiwipi numwitaatiwe undisiha (8:1-9:15)

Ko saindimanti kiya komi piwiha kaundisiha baiwi atiwiwi piwiha kaapi akaahe tiwi gwinyaitaatiwe. Iyati ami Poriho komi otipipati kaipatapi saindi saindi kiyataayo tati piwiha ausaati kaundati ami Awaisiho Jisaasiho Komi otipipati kawitandi gaatati numwaasitihandapimaawi kaundisiha (10:1-13:10)

Poriho komi piwiha kaundimi noti osasepihaasiha (13:11-13)

1 ¹ Nini Porihonini Kiraisi Jisaasiho komi piwiha awusaitandi kandati naninyati natanoaasisihonine. Nini Kiraisihomi piwiha awusaitandi Autaahaatiho maaritataati ningi nanimahanati piwiha naninyati neti natanoaasisihonine. Nini sapi utipimo kimo jipatipiyataayo. Iyataati

nyami naisoho Timoteho kimo ningisati kimbibi maasi bindihaawi maisihoaanji Autaahaatihomi isihyaami aunahipa awaipati sitihandi Korindihanda bimohiyihyaatangisuni ami Autaahaatiho isihya komihyaimatitaatiwi namihainjawihya yapipati Akaiyaahanda bimohiyihya nahatiaisuni ahoya gaahuraare satihaato. ²Iyaha nyami Apiho Autaahaatihouni ami nyami Awaisiho Jisasi Kiraisihouni sangisi gaahandi kasimi nepi anditisaisaihi sahi wapaapi pihitiwi windi gimunyaapi ami sami maariho windi noti nasatimaitandi yihooanji Autaahaatihoai piwaundiha nunjenhaayo.

**Autaahaatiho Komi Isihyai Anditiwataise
Wapaara Neti Nusopisasihihura**

³Nyahi Autaahaatihomi ambipati niwimaitihaawo. Ami kimi ko Autaahaatimo nyami Awaisiho Jisasi Kiraisihomi Sapihoso. Iyati ami ko Komi maariho asipiyati tundindihandami tanyaahosi nasisoari nyangi maariho asipinyisati nyatatamanati ami neti anditinyaiwahore. ⁴Ami ko siyahosi nini naanjihaiwa nehonihiura ami ningi ko Autaahaatiho anditiniwataise, ami isihya usa naanjihaiwa nesaihihiyai nini kati kaindi ami anditiwiwitando. Isi ami ningisi Autaahaatiho neti anditinisipatamataindi kimi kireti isihya usa kiya naanjihandi nesaihihura nini nga kiyai anditiwiwito. ⁵Iyataati ami Kiraisiho Komi maariho ambipati yaawihaiwa konihi nepi naipatamataindi nini koai niwipinjohihoninisangi ami noaipati Kiraisihomihoninimatonihi isihya nisi maariho ambipati yaasihaiwa naninyawaayopo. Iyataahandi kandi ami nini Kiraisihomihoninitali Autaahaatiho konihi ningi taati anditiniwati ninjatimi notaise. ⁶Ami nini nisi ambipati maariho yaasati mimaipinimatahaiwa taati nehohiwimaiwa apaapimahe Autaahaatiho ningi anditinihonihi sahi ningi ninjaitaatiwe. Ninjawaawi ami nyangisangi Porihoai Autaahaatiho anditiwisipatamatiyati anditinyaiwitaiso tiwi Autaahaatihopi baiwi giwunyaasaihi ko sangisi japihi nasamaati anditisaihonihoni sahi sami maariho ambipati yaasihaiwa nehohiwaiwaapi sahi yaiwi windi timaamihaitaatiwe. Iyataati Autaahaatiho nini nisi ambipati maariho yaasihaiwa nehohura anditinisitimandi apaapimahe ami sahi ningisi ninjawaawi satiwini nyangisangi sikireti Porihoai Autaahaatiho anditiwisipatamatiyati nyahi yaasihaiwa nesaihihura anditinyaiwitaiso tiwi sahi anditititaatiwihandi naitaatiwe. ⁷Aihi ami nini sapi saindi kiya yaawihaiwa newaahandi kandi kiyaanihi watipitiwi bitoaitaapo ndi gisunyaataayo. Ami sandi apaapimahe sahi sami maariho ambipati yaasihaiwa nini nehohipatamataiwi nesaihi Autaahaatiho ningi anditinisipatamatiyati sangisi ko anditisaiwitaihi nini mmoniti gwinyaataate.

⁸Isi nisi naisihyaate, sandapi sahi mmoniwise. Nini nisi maariho ambipati yaasihaiwa asakaindi yapipati Piropinjihandi Esiyaahanda

nanoaipasihini nini netaayo. Iyataati saiwa nisi maariho ambipati yaasati mimaipinimatiwaiwa apipaahi aungwohaiwanda nisi anditatami watipihandi nanitipihaahandi nini nga windi neti timwaapwilitaahetahaiwa ningi nanoaipataise. Aihini kimandi kandapi nini saindi mmoniti gwinyaataayo: Nini windi asohoninimetito, napwito ndo. ⁹Sandi saimainjihini ami akitinini nini sandi; e wani kimura nisapi ko napwito tati Autaahaatiho katati gwinyaasurandaatisi nini kapwitande ndi gwinyaataayo. Ami nini sandi saindi gwinyaahohitimandi apaapimaahine, nini niwahonini watipihoninisi nga andititondi windi niwahonisapi minjatindi nehi Autaahaatiho apipaahi watipihini ami isihiyani aini napomahohiyihiyaisangi ahowimati japihini numwaasihoi nini nisi maariho ahiyati koaisaahini winjatitande, ami ko ningi nitatamanati nga anditiniwitando. ¹⁰Iyataati jihura nini saindi napwitandi detitihihura Autaahaatiho ningi japihini nanimaahore. Siyati ningi japihini nanimaahosi wapa ningi neti mimaipinisati nanopisasitandihapa nanoaipahonihura kaiwaatihapi ko ningi japihini nanimaaitaise. Nanimaahotihini ami ningi wiwa neti nanopisasati yaasihandi nanimitandihaiwa nanoaipahonihura Autaahaatiho konihini japihini nanimaapi nutandi nini Kopi watipindi giwunyaataayo. ¹¹Iyataati sahi nisapi gaapunditaatiwi nini gwinyaataati: nisapi gaapundiwise satiti nasisenataayo. Iyataati ami isihiyani taahiyihiyani nisapi gaapundisaihi Autaahaatiho gaahati kiyati kiyani gaapipati atiwisati ningi neti nanopisasitandihaiwa wiwa nanoaipasiwaiwaatihapi nanimaahonihini ami kandapi isihiyani taahiyihiyani Autaahaatihoai kinyi gaahone gaare unditaapo.

Poriho Korindihiyani Napitini Jasondo Undataahandi Kandi Noti Mausose

¹²Iyataati nini akitinini maarititini sandi kandaato. Isihiyani nahatiyaami ndihetini gaahonini saasanotahonini daindi bitondaayo ndo. Iyataati ami sa piwani nini katohimaapi nisi maarihoaisangi akite tati ginunyaatataise. Ami sahihini aini sawanaati mmoniwihiyate. Nini sami otihatihini titihini saasanotahonini Autaahaatiho maaritirihiretini sami ndihetini auta daindi bitohonihini. Saindi daindi bitondaati isihiyani Autaahaatihoai mausoniwihiyani amitiha gaaha gwinyaahohirihiretini neti japepilirataamaayo. Owetise. Nehi nini gaahandi windi kamaindahandi kandi Autaahaatiho nehi koaisunyaati gaahati kanisati anditiniwitandi kopi giwunyaataayo. ¹³⁻¹⁴Iyataati utipiwa nini sapi jipatipiyohiwiwa sahi nga awitiwi mmoniwini nasesipatitandihiretini nini jipatipiyataayo. Iyataati wanimura sapi nini jipatipiyohiwiwa piwiha nahata sahi windi moniwini namaasesipainje. Namaasesipainjihinihandi kandi ami sapi saindi kiyani ipotihura biyati nusesipatonihini mmonawaawi Poriho wapa namoasati nahataapa titihini akitinini kanyatataase titaatiwi nini gwinyaataayo. Ami sahi saisaihi nyami Awaisihini Jisaasihini isihiyani neti

tipitapaati usondandi japihi nasonihura nini sapi maaritisanahi ami sahi nisapi maarititaatiwo. ¹⁵⁻¹⁶ Ami sahi nisapi maaritauhi kandapi Piropinjihandi Masetoniyaahandaahapi notaati jiji sangisi jainjaitandi gwinyaaho. Jainjapi nundati ami japihi Masetoniyaahandaahiraapi nasataati jihaati jainjaitando. Saindi yataira jainjati ami asisiha waati neti sangisi Autaahaatiho jatatamanati anditisaiwitandihiretapi nini sangi piwaasatitanda. Sangisi saindi piwaasatiti nasahosisanihi ami sahi sura wapa nini Piropinjihandi Judiyaahandaahapi isisi nutandihapauni ami ningisi daihira anditiniwitandihapa wapauni nanimitaatiwo. Sandi nini katohitindi apipaahi akitinihi kaitandi gwinyaati kandaato. Jaipipaamaahe. Owetise. ¹⁷ Isi ami sahi nisapi Poriho ko nehi piwiha etitaatindaaso tiwi nini napiti sangisi jasondo satohitimandapi gwinyaawaayowo? Ami ninihi wapa kaitandi gwinyaati piwiha wisasohirihireti utaaho wo Autaahaatihoai mausonaho kairihireti kiyataamaayo, ami sahi nisapi saiwi sireti gwinyaitaatiwo. Aindi ami naasikura utaaho wo isihiyai saundati: “Ye akitinihi nini sandi kaito,” undatosati ami nehi niwipihandi tanyaaha owehandi nepemaitati satati: “Owe. Nini windi sandi kamaito,” undisihomataindi kiyataamaayo. Owe. Nini windi saindi kamaindihonine. ¹⁸ Ami akitinihi Autaahaatiho wapa kaitandi jiji piwiha timanati sapa kaito tati katimbipa nasisoaari titihi kapaahihi kiyahore. Aihi ami nisangi sikireti kiyataayo. Aindi nini windi apipaahi sandi: “Ye, kimandi nini kaito,” ndosati tanyaaha owehandi nepemaindi owe. Nini sandi windi kamaito ndi kandihoninimahe. Owetise. ¹⁹ Iyataati ami nini Porihonini Sairaasiyi Timoteyaisati maasi Autaahaatihomi Mwaaho Jisasi Kiraisihopi katawaasasohiha windi motinati namaasesipataha yaingwanaani sangisi katawaasasihaamaayo. Nehi naasaahihi katawaasasihaayo. Iyataati Kiraisiho kopi Autaahaatiho satati Kiraisiho setaho noaipati ami siyahaiwa kaitaise tati katirihiri kireti ketaho noaipati ami wapa ketihapa kiyataise. Iyataati Kiraisiho Autaahaatihoai windi apipaahi samundahore: “Ye, nini kinyi maaritingitihandihihi kaitaano,” undatosati ka nema wapa ko sawaho maaritimbipa kiyahomahe. Owetise. Kiraisihohi Autaahaatihoai, “Kinyi maaritingipipaahihi kaitaano,” undimbipa kapaahihi titihi kiyahore. ²⁰ Ami kimandi nini apaapimaato. Nahataapa isihiyaisuni ami kiyaapuni kawitandi Autaahaatiho jiji timanati katati ahaimbipa Kiraisiho neti isihiyai kapa nahataapa kawisati gaamataise. Aihi ami sandi Kiraisiho kaಿಂದံသိပျာစီကဲ့သို့ နှစ်ရက်စီကား: “Ye, akite. Autaahaatiho isihiyaisi kawitandi jiji timanati katimbipa kapa kiyataise,” taati Autaahaatihoai newaati mepi autaahewaumwihaayo. ²¹⁻²² Iyataati ami Autaahaatiho nehi ko sawahohihi ningisuni ami sangisuni anditinyaisihi ami nyahi Kiraisihopi andititaati giwunyaahaayo. Giwunyaahonihhi Autaahaatiho komi Itipiho Gaahoai neti natausaasihhi ko nasati nyami omanjitihhi

maarihoatihi bindataise. Iyataati so Itipo nyami omanjitihi bimisoraahi Autaahaatiho sanyatati: “Sahi apipaahi kiyaatinihi nisihyaatimatitaatiwi nasamihanataayo,” nyatataase. Iyati ami Itipimo Autaahaatiho nyangisi nanyinyati neti natausaasihi nasati nyami omanjitihi bimiso so ipotihura nyahi komi isihyaanangi gaahaiwa nahataapa nanyamitandi neti jiji apipaahi katati timanati ahaimbipaami jihapihapa nanyinyataise. Ami ipotihura gaahapa nahataapa sapi namihandi ahiyopipa nasamito nyatato.

**Porihō Korindihiyai Keti Noti Maawinjasitihandapi
Nusesipati Kaundataase**

²³Wani kima piwima nini keti japihi sangisenda namaasohitihandapihaare. Nini sangisenda japihi keti notaataahi ami maipihandi samihatihī ahotindihandapi piwiha apipaahi watipiha kasatisanihi ami sami maariho omanjitihi yaasati neti nasopisasinati maipititaihi kandapi nini sangisenda japihi keti kura namaaso. Iyataati ami piwiha sa nehi akiti akitihaanihi Autaahaatiho ninjati mmosihi nini kandaato. Isi ami nini jaipitisaanaahi gaasi Autaahaatiho ningi neti nanosasane. ²⁴Iyataati ami sahihi aimi andititiwi Jisaasihopi taawi nga giwunyaawaayopo. Saiwi sahi giwunyaawaayowi nini sangisi sasatiti nini Kiraisihopi kandisasohipipa sapa sapaapi gwinyaapise satitandimaahe. Owe. Nini nehi sami Kiraisihopi aimi giwunyaahohitihandi neti anditisaiwataayo ami sahi kiyaatinihi Kiraisihopitiha piwiha akaaha andititiwi giwunyaapi maarititaatiwo.

2 ¹Aihi nini piwiha apipaahi watipiha waapihindi jiji napiti kasatohipatamataindi kasatisanihi ami sahuni ninuni nyami maariho yaasati nanyopisasindaihi kandapi nini namati usinjaati keti kuraanihi maipihandi samihatihī ahotisura namaaso. Isi sahi sawanaati sandapi mmondaapo. ²Iyataati ami nini sami maariho omanjitihi neti nasopisasiti yaasihandi nasamisanihī sahi windi maarimitisaihi ami ningi nisi maariho omanjitihi nepi nanipipaisaihi nini maarititandihiya Korindihiya usa bimimitaapo. Ami nehi sahihiso. ³Iyataati ami sandi kandapi nini gwinyaataati keti titihī kuraanihi sangi jasondandi namaapiti nisi utipihō jipatipaindi sapi aimi nusoasataayo. Ami sahi samihatihī maipihandi ahotindihandapi japihi nepemaitiwi ami sahi sawanaati titihematisaihapo. Ami nini sangisenda napisanihura sahi nisi maariho yaasati maarimititihandi naninyawi nini maarititandi sahi nisi maariho nepi nanipipaitaatiwo. Aisaihi nini nisi utipihōatihi aimi kasatohipatamatiyaati nyahi nahatiyaani sahuni ninuni maarititihaawo. ⁴Nini sapi utipimo kimo sireti saindi jipatipiyohitimandi apaapimaahe nisi amitiha nanopisasinati waati mitaahi pihindi gwinyaati ami nisi maariho noti nasanisati yaasati nanitimasihī ami nini gwitimetaati

kutipati katisati jipatipiyataayo. Iyataati nini sangisi apipaahi aungwohandi nisi maariho nasanyohitihandi sahi mmondaatiwi jipatipiyataayo. Ami nini sami maariho omanjititih neti sangisi yaasihandi nasopisasisanihi mandiropatiwi isetitaatiwimaahae. Owetise.

**Porihō Korindihiyai Utaaho Maipihandi Kaisihoai
Japihi Numwaapise Undataase**

⁵Iyataati ami utaaso so nisuni samuni maariho neti nanyopisatasi yaasihandi nanyamiso nyahi nahatiyaanangi kanyisataise. Iyataati ami ko piwiha katati timanati kaindindi sahi nahatiyaatangi wamwaanji wamwaanji nasetaise. Ami nini sandi ko kaindihandi wamwaanji wamwaanji sangi nasetaise tohitimandi apaapimaato kandapi piwiha aimi nini katoha sikaatihito. Aihi ami nini kaami tiwatihati naimaati wa japihi katitandi pondihito. ⁶Iyataati koaisi titihapumwaitaatiwi ko maipihandi kaindihandapi wihoaanji aimi nunyawawi sandi ipotihura kinyi windi kamaatipi kamaime undohitindi gaatihito. Aihi ko maipihandi kaisiho namati wani aimi nepemaitataise. ⁷Isi wani sahi ko maipihandi kaindihandapi nanipimatiwi komi maipihandi kandinihi nepumapi japihi numwaapi koai sahi anditiwipise. Ami sahi komi maipihandi nepumaamasaihi kandapi ko pihititi waati maariho asipiyati gwinyaatoanda wiwa daahi konihi nopisasindaiso. ⁸Ami sandi kandapi nini sangisi tariwisatiti sahi auta koai nunjawi maariho nunyawawise satataato. ⁹Ami jihi nini sangisi sasatiti koaisi sahi waati waati watipitiwi piwiha kaundiwise satohitindi nini kasatohipipa kapa sahi atiwi kiyowondi mmondandi piwiha sapi aimi jipatipiyao. ¹⁰Ami sahi utaaho womi maipihandi nepumawaawaahi ami ningisangi maasi timaamaititi komi maipihandi nemwataayo. Iyataati utaaso so ningisi maipihandi kanisoai komi kaindihandi awaindihandimetihihandi kandi ko maipihandi ningi kanindihandi nemwataayo. Sahi nepi japihi timaamaitiwi itatamanindaatiwi gwinyaataati utasomi maipihandi nemwataayo. Sandi nini akitinihi titih kiyataayo. ¹¹Iyataati sandi nyangi nanyoapisitindi wiwa Bwaasirihiri neti awaindemati daahi nanyopisatasi nyami timaamaitohitihandi neti nanyisipaitaihe. Isi ami nyahi Bwaasirihiri kaiwaiwa mmonaahiyaanisi nyahi Kiri windi nehi maawinjaati ami windi namaawupwaitihaawo.

Porihō Koaisi Autaahaatiho Otipipati Numwipatapi Kandaase

¹²Iyataati wani piwiha nehi kai wa nini katitandiyo: Nini Kiraisihopiha piwiha gaaha waniha ausaitandi aunahipati Tiroaasihanda notaayo. Saindi niyonihimi ami Awaisiho nini komi piwiha kapihi isihiyai kandunjitandi daihira neti daanuwati titihenimataise. ¹³Saindi kaindunjitandi daihira nutati japwaatataahandi kandi sapihi nisi naisoho

Taitusihoai piwiha sapiha isisihoai woaisi nini mausonataati ami kandapi nisi maariho windi yatihimaanitise. Ami sandi nini sapi pihindi gwinyaataate. Aihi ami sapihi nehi masihonji isihiyaisati bimambiti kiyai numwasi gaasi bimaawise unditimapi yapipati piropinjihandi Masetoniyaahandaahapi notaayo. Iyataati nini Taitusihoapi daapi notaayo.

**Autahaatihomi Watipihandaahi Aposerihiya
Tiworisai Tipi Ipihatisawaayopo**

¹⁴Iyataahandi kandi wani nini Autahaatihuoi kinyi gaahonje unditi mepi autaahemwataayo ami nyahi komi piwiha nesi daayaati ausaawa kataunjohiyihiyaanini Kiraisihoaisaati timaamaitohitihandi Autahaatihu nasisoaari neti anditinyaisihi ami kahapaamapipa nyahi komi otipipati kawithaahira neti nanyisapusiwaiwai nyahi newaati tiwa ipihatisawaamihaayo. Nyahimata tiwa ipihatisotimandi siyaati nyahi tiworisai tiwa ipihatisaati isihiyai numwaasi nasohiyihiya kimiye undiwi nasoaaniwi aunihyohipatamatiyaati isihiyai nunjihaayo. Iyataati Autahaatihu nyangisi nahataapipihini neti natanyoaasihi isihiyaisi komi piwiha nyahi katawaunjiaayo. Katawaunjonihini kiretapi isihiya Autahaatihopini mmoniwi giwunyaawaayopo. Iyataati komi piwiha nyahi isihiyaisi katawaunjohiha sa wapa apipaahi gaahapa waamainjotihapaamatiyati noaipati isihiyaamihatihini ahondaise. Ahotihi ami isihiya nahataapipihini Kiraisihopini mmoniwi giwunyaawaayopo. ¹⁵Ami siyati wapa waati waamainjotihapa nahataapipihini noti ahotipatamatiyaati Kiraisihopini piwiha nyahi nesi nahataapipihini isihiyai Kiraisihopini giwunyaahauhi Autahaatihu taati japihi numwaasawihyaamuni ami Kiraisihopini gimaawunyaahauhi Autahaatihu namumwaasawihyaami otihatihini isapipa kwitaahomatiyaati tiwihaawaati isihiyaisi katawaunjiaayo. Katawaunjonihini ami kandapi Autahaatihu nyapi maaritataise. ¹⁶Iyataati ami isihiya Kiraisihopini piwiha nyahi isihiyai katawaunjohiha atihomiwi nemahohiyihiyai Autahaatihu saundati sahi ningisawi windi asitimatiwi bimimitaapo unditaise. Kiyaisi Autahaatihu saunditandihyaasi nyahi piwiha Kiraisihopini katawaunjohiha kiyaami maarihoatihini itapipaami andihiramataiwiha newaayopo. Iyataati ami isihiya nyami piwiha atiwini nepemaitiwini nehauhi Autahaatihu taati japihi numwaasawihyaaisaahi Autahaatihu sahi ningisawi asimatitawihandi nepi bimitaapo undataase. Saundisawihya nyami piwiha kiyaami maarihoatihini wapa apipaahi gaahapa jipiyati waamainjotihapaamatiyati kurimwinati nusoaipasihini atiwini mmoniwi newaayopo. Isi ami isihiya diyaanihini nehi sawana nga piwa sa katiwunjitaapo? Isihiya sawanaami anditata nga sati otipiti windi kamaitaapo. ¹⁷Ami ninihini nga sati otipiti kaito ami ninihini isihiya usa taahiyihya samihatihini sahi usohauhi bindawa Kiraisihopini

nyahi piwiha kataunjisaihi isihya atitaatiwi nawiho awaisiho nanyamito tiwi isihyai katiwunjohiyihyaamataindahoninimahe. Owe. Nini saindi windi kaindahoninimahe. Nini Kiraisihomi otipipatihoninisi komi otipipatihyaamihiri kireti japepihiriti Autaahaatiho ninjatihi ami ko sawaho piwiha naninyati natanoaasisiha akitinihi kaindungjataayo.

**Aposerihiya Autaahaatiho Komi Isihyaisati Piwiha
Waniha Wisasisihaami Otipipatihyaare**

3 ¹Ami sahi usaati nisapi satiwi Poriho nyahi komi ambipati niwimaitihaawi piwiha sa jipatipiyataise tiwi gwinyaawaayowo? Nini neti niwahonini gaahonine ndi naimaatitandi sapi utipihso jipatipiyataamaayo. Owetise. Ami sandi apaapimaato. Nisetirihiretapi isihya usa sangi kasatiwi utipihso jipatipaitaahetahoninimahe. Aindi ami sahi nisapi nisetirihiretapi Poriho gaaho ami maipihoe undiwi isihya usaisi utipihso jipatipaiwi kaunditaahetahoninimahe. Ami sandi isihya usa sapihi sahi usohauhi samihatihso bindawaawi jaipipa taawi sangisi katiwisasohiyihyaahihso sireti kiyawaayopo. ²Ami ninihi nisapaahi sahi sawanaati noaipapi nisetirihiretapi utipihso pasihandamataiwi isihyaisi nepi kaundiwi nunjawaayopo. Ami nini piwiha kandisasohihaaraahi Autaahaatiho neti nasepemisihso sahi noaipapi gaahyaatimatauhi ami sami dahopa piwiha isihya nahatiya nga mmonawaayopo. Mmonawaawi kiya satawaatopo, e Poriho piwiha akaahaahihso kiyai kataunjihso ka neti kiyai gaahiyemwati nusepemaahiwataise tiwi mmonawaayopo. ³Sahi sametirihiretapi sawanaati sami piwiha dahopaara isihyaisi nunjawaayopo. Ami nini samihatihso bindataati Kiraisihopi komi piwiha kasatiti kandisasohitihandaahi komi piwiha sangisi neti nasepemisihso sahi gaahyaati noaipihauhi ami sami dahopa isihya nahatiya utipihso pasihandamataiwi mmoniwi awitawaayopo. Iyauhi sahihso sami piwiha dahopaara isihyaisi nepi Kiraisihso sawaho komi piwiha utipihsoatihi jipatipaisihomataiwi nunjawaayopo. Iyataati sandi sahi utipihso isihya nahatiya awitohihomataiwi noaipahohitimandi Kiraisihso piwiha wapa utipihsoatihi jipatipaihahaamahe. Ami Autaahaatiho apipaahi watipihso konihso bimisihomi Itipihso sami maarihsoatihi otipipati kaindahandaahi sahi saiwi noaipawaayopo. Iyataati ami sandihso Autaahaatihomi winihapipa nawiha najaatipataatihso jipatipindisihsoamatiyahaamahe. Owetise. Ami nehso Autaahaatihomi Itipihso isihyaami maarihsoatihi bimisihomi otipipati kaindahandahe.

⁴Ami nyahihso Kiraisihsoaisaati aimi timaamaitaahiyaanisohso kandaahi Autaahaatiho komi otipipati sawaho nga kaitaihso nyahso koai winjatihsoayo. Komi otipipati Autaahaatiho nga kaitaihso ami nyahso saiwa nehso nanihiyaati katihsoato. ⁵Iyataati sati otipiti nyahso yawanaani

nga kaito taati katihaamaato. Owetise. Ami nyahi yawanaani isihiya usaisi newaati nusepemaahiwaati gaahiyemwihaamaayo. Nehi Autaahaatiho sawaho nyangisi neti anditinyaiwataise. ⁶Ko nyangi neti anditinyaisihi Autaahaatiho piwiha waniha Komi isihiyaisati wisasisihaapi isihiyaisi piwiha katawaunjithaawi Autaahaatiho sawaho nyangisi nanyamihanataise. Ko siyati nanyamihainjihi isihiyaisi piwiha winihapipaami jipatiipindisiha kaundihaamaato. Owe. Autaahaatihomi Itipiho Gaaho isihiyaami maarihoatihi bimisihopi kaundihaato. Iyataati Autaahaatihomi Itipiho sohi isihiyaisi neti nusepemaahiwati kiyaisi asitimataatiwihandi nunyataise. Aihi ami winihapipaahi isihiyaisi sahi maipihyaatisi kandapi sahi piwiha nepi Autaahaatihoapihapi nawisapitiwise undataase.

**Autahaatiho Isihiyaisati Piwiha Waniha Wisasisihaami
Nausainjithandi Awaindihandisaare**

⁷Iyataati Autahaatihomi winihapipa Mosesiho isihiyaisi kataunjimbipa ami kapa windi minjapepihirohihiyaisi sahi winihapipa windi minjapepihrowi kandapi piwiha nepi napopise undataase. Iyataati sapa winihapipa nawiha najaatipataatihi Autahaatiho jipatihiyahaare. Iyataati winihapipa siyati kapa nepi sehimwaahohiyai sahi piwiha nepi napwitaapo undihapaasi Mosesiho isihiyai kataunjihi komi ndimaahomwaaŋi Autahaatihomi nausainjithandi noaipataise. Ami sapa winihapipaapi Autahaatiho gaare tiho. Iyataati bipi kihura kihura taati owendaahandi kandi Mosesihomi ndimaahomwaaŋi waati awaindihandi nausaatihi Isiraherihya Mosesihomi ndimaahomwaaŋi windi kiyaanihi utaari maawinjasopo. ⁸Isi ami Autahaatihomi winihapipaami otipipati Mosesiho nesipati nausainjithandi apipaahi awaindihandi gaahandi isihiyaami maariho komi Itipiho Gaaho nyami maarihoatihi bimisihora isihiyaami maariho windohaiwa apipaahi awaiwaiwa gaahaiwa kaitaise. ⁹Iyataati ami piwiha isihiyaisi sahi maipihyaatisi sami maipihandapi piwiha nepi napopise undisihaasi Mosesiho kataunjihi Autahaatiho komi nausainjithandi awaindihandi neti nunjise. Isi ami nyahi isihiyaisi kataunjaati saundisaihi Autahaatiho sangisi sasatati nini sangisi sasatataato: Sahi maipihandi owehiyaati nisi ndiheti noaipawaayopo satitaise undisaihi Autahaatiho komi watipihaiwa isihiyaami maariho windohaiwa neti nunjitaise. ¹⁰Iyataati Autahaatihomi piwiha winihapipaami watipihandi nausainjithandisati Mosesiho komi ndimaahomwaaŋi nausaataho isihiyaisi kataunjindihandi aimi owetise. Ami Autahaatiho piwiha waniha komi isihiyaisati wisasisihaisaati nyahi newaati timaamahiwaati mmonihoniho. ¹¹Iyataati ami Autahaatiho komi piwiha winihapipa windi utaari ahimotati wani aimi owetisihaasi nausainjithandi ami watipihandisati Mosesihoai

Isiraherihyaapi numwisi ami komi piwiha waniha isihiyaisati wisasisiha kaanihi jinjapihi ahotitandihaaahi watipihandi ami niwusainjitihandi awaindihandisiha isihiyai nunyati nunjitaise.

**Autahaatiho Piwiha Waniha Wisasisihaami
Otipatihyaanimatihaayo**

¹² Ami siyati Autahaatihomi piwiha waniha komi isihiyaisati wisasisihaami watipihandi nausainjitihandi windi owemetati kandinihi ahotitandihandihini nyahi windi yamaayaati watipitaati isihiyaisi katawaunjiaayo. ¹³ Siyati watipihandi nausainjitihandi Mosesihomi ndimaahomwaaŋi niwusainjitihandi taati bipi owetimi naihi ami Isiraherihya windi mondo tati komi ndimaahomwaaŋi namaasasipatamatiyaati nyahi Autahaatihomi piwiha waniha noaasihaamaayo. Owetise. ¹⁴ Iyataati ami Mosesiho siyati koaisi Autahaatiho winihapipa numwihi komiheti ndimaahomwaaŋi awaindi nausaataho winihapipa Isiraherihiyai kataunjataise. Kataunjihihandi kandi ami kiyaami atihiri nepi nisaputiwi atihomisohtihanda winihapipa Autahaatiho kiyai wisasati numwimbipa windi mmoniwi ami minjapepihiropo. Iyataati ami wanisangi kiya winihapipaami piwiha jiha jahiha awitawaawi kiyaami amitiha apotihiri wapa numwaasati niwisapusihini asihatamasipatamatiyati daahi namihatati asihatihini piwiha waniha Kiraisihopiha (Autahaatiho wisasati komi isihiyai numwisiha) winihapipa jihapaami piwihai nemati aunahipati netaise tiwi kiya windi mohopo. Apotihiri wapa neti niwisapusitihandamatiyati kiyaami amitiha daahi asihata namihatisiha kiya Kiraisihopi giwunyaasaihaahihini nusorihaatitaise. ¹⁵ Nahateweti Autahaatihomi winihapipa Mosesiho jipatipaimbipa awitimi napiwi wani kimuraisangi Judaahiya taahiyihyaami amitiha windi namausorihaatise wapa apotihiri nurimaasasihandamatiyato. ¹⁶ Iyataati ami Autahaatihoaisati piwaatindandi niyataahura apotihiri apipaahi pupwihirihiri komi ndimaahomwaaŋi nisapuwati wisasainjirihiri nausohaamasipatamatiyati Judaahiyaami wo nepemaita Autahaatihoenda notaati komi amitiha asihata namihatisiha apotihiri nausohaamahohipatamatiyati amitiha nusorihaatati winjapwaatataise. ¹⁷ Iyataati ami Itipihoho Gaaho toho so Autahaatihomuni ami Kiraisihomuni Itipihopito. Iyataati ami isihiya Autahaatihomi Itipihoho Gaaho nehohiyihiyai japihi numwaase kiya satiwunyaapi nyangi sahi gaahiyaate nyatati Autahaatiho nanyamaito tiwi anditatu napamapi winihapipa japepihrohitihandaatihapo. ¹⁸ Iyataati nyahihini nyami ndimaahomwaaŋi Mosesihomi ndimaahomwaaŋi apotihiri namaasandipatamatiyati nanyamaasandataamaise. Aisi ami nyahi Kiraisihopi ngiwunyaahohiyihyaanini nahatiyaanamiheti isihiya nga mmonawaayopo, ami Autahaatihopi ko apipaahi akitinihi

awaisiho watipihoe tiwo. Ami nyangi ko bipi kihura kihura neti nanyepemaahiwati nyami maipihaiwa nenyamasihosi ami nyahi noaipawaati sawahomatetitihaawo. Ko nyangisi sanyisonihi isihiyaisi newaati nyahi Autaahaatiho apipaahi akitinihi watipihoe awaisiho gaahoe undaati nunjitihawo.

Nyahi Oniha Yapipati Wapa Gaahapa Windisihaamatiyaahiyaanine

4 ¹Iyataati Autaahaatiho nyangi maariho asipinyisati komi piwiha waniha apipaahi gaaha isihiyaisi nyahi katawaunjitihawo nanyamihanataise. Nanyamihainjihyaanisi nyahi isihiyaisi Komi piwiha katawaunjitihahandapi napaisaati ahiyawa newa maanimaanisaati namahaamaayo. Owetise. ²Iyataati ami nyahihi wapa nehi akiti akitinihi akipipaahi isihiyaisi katawaunjitihawo aimi nyami maariho newa kipwinaati gwinyaahaayo. Iyataati wapa nyahi kaisaihipa jaipipaatanihi isihiya mmoniwi katisaihi nyangi manyitandihapa windi nyahi kamaayo. Iyataati nyahi sangisi wapa jaipipa kamaasato. Owetise. Nehi nasisoaari Autaahaatihomi piwiha akiti akaahaahihi nyahi sangisi nasesipawaati katawaasasihaayo. Siyaati nehi Autaahaatihomi piwiha akaahaahihi Autaahaatiho sawaho nyainjatihi auta sahi (Autaahaatihomi) isihiyaatangi katawaasasihaayo. Ami isihiya usa mmonawaawi nyahi nehi piwiha akiti akaahaahihi katawaunjaihi ami kiya nyapi satiwi sahi piwiha jaipipa katiwunjopo nyatiwi windi ikwimaanyitaatiwo. ³Iyataati ami sahi nyahi Kiraisihopi katawaunjohihaapi satiwi isihiya usa sami piwiha katiwunjohiha windi mmoniwi namehopo tota akititonaahi ami sandi nyahi nga titihi katawaamunjonihimahe. Owetise. Ami sandihi isihiya siya sawana kiyaami atihiri maariho nepi nisaputiwi nyami piwiha atihomisohitihandahe. Saiwi atihomisauhi ami Autaahaatiho kiyai saundati sahi nisi piwiha atihomaanisowi kandapi piwiha nepise undihihyaataawaawe.

⁴Iyataati ami Bwaasirihiri isihiya nehi maapi yapimbatambihaiwaapaahi gwinyamapi ami Kiraisihopi windi gimaawunyaahohiyihyaami amitiha neti niwisapusihi Autaahaatihomi piwiha waniha Kiraisihopitiha nyahi isihiyaisi kaundaati katawaunjohiha windi mohopo. Kiri Bwaasirihiri siyati neti niwisapusihi ami kiya Kiraisihopi piwiha sisiha nausainjitihandamatiyati kiya daiwi bitohohirihireti neti niwusoatoonihi kiyaami amitiha nga nusorihaatitihati kati namusorihainje. Owetise. Iyataati ami Jisaasihoaisangi Autaahaatihomatiyahosi ami Autaahaatihometirihiretapi komi nausainjitihandi watipihaiwa nga titihi nyangi neti nanyisataise tiwi kiya windi mohopo. ⁵Iyataati apipaahi akitinihi nyahi sangisi sasataati sahi nyami piwiha atinyiwi ami nyahi katohipipa kapa kaiwise taati ausaahaamaayo. Sireti windi amusaawaati ami kimireti sataati

sahi Jisasi Kiraisihoai atiwiwise ami ko (nyami) Awaisihoso taati piwiha ausaahaayo. Ami sandi sangisi jatatamanaati ami anditisaiwitihawi Kiraisiho kanyatiji kiyahaayo. ⁶Autahaatiho waara satise. “Wapa owetati asihatindihandihiji ahotimbipiji nausaatati saasanotane,” tati katiji ami kireti noaipase. Ami ko satisiho kimiko Jisasi Kiraisihopi neti sisihaamatiyati nyami daaya bitohohitihandi nanyepemaahiwataise. Ami ko siyati nyami dahopa bitohohitihandi gaahiretenyamati nanyepemaisitimandi ami Autahaatihopi isihiya satiwi ko apipaahi nausaatati sanahihotati ami isihiyaisi maariho nunyati ami watipihoe tiwi mmondaatiwe, Jisasi Kiraisiho komi ndimaahomwaanjetapi nyangi neti aimi nanyisirihireto. ⁷Iyataati ami nyahi Autahaatihopuni ami Jisasi Kiraisihopuni mmonihohitimandi wapa apipaahi gaahapa oniha yapipataahisangi ami wipati jaatipataahisangi naumbwinati ami nawatatitandihapopi windimbipaamatyahande. Ami nyangisangi kimikireti nyami ambipati windi anditimitati oniha yapipati neti naumbwinati nopisasinjipamatiyati napoti nopisasinahati kateti Autahaatihomi piwiha Kiraisihopiha apipaahi gaaha anaahiha ahondaise. Iyataati otipipati kimati Kiraisihopi piwiha ausaawa isihiyai katawaunjitihaahandi watipihandi sandi nyangi yawanaanamihetapi nehaamaayo. Autahaatiho nyahi komi otipipati kawitihawwi neti anditinyaiwati komi watipihandi nyangi nanyinyataise. Ami isihiya Autahaatihopi satiwi komi otipipatihiyai ko watipihandi nunyati anditiwiwataise titaatiwo. ⁸Iyataati nyami tiworisa nahataapipiji nisapupwi kihihoaagapi nyami ambipati yaasihaiwa tiwati nyepaiwi nanyinyawaahandi kandi ami Autahaatiho kiyaisi windi nehi maawinjasihiji ami nyami watipihandi kiya nepi kandinihi owemaanyamahopo. Nyami tiworisa saiwa ambipati ami maariho yaasihaiwa pihitiwi tiwati nyepaiwi nanyinyauhi ami nyahi wapa kaitihaahapaapi gimaanyunyaatati naharimatataahandi kandi nyami amitiha (maariho) daahi kandinihi windi neti namaanyopisasinje. Siyati apipaahi kandinihi neti namaanyopisasinjiji ami nyangi Autahaatiho windi namaanyamati nga nyatatamanati anditinyaiwitaiso taati nyangi nanyoapisipipaapi windi yamaayo. ⁹Iyataati isihiya tiworisa nyangi ambipati (maariho) yaasihaiwa nanyinyami niyauhihendi kandi Autahaatiho nyangi windi namaanyamase. Aihiji nyami tiworisa nyami ambipati yaasati nasipatati jitipati noahaiwa yainyapi nyawawaahandi kandi ami kiyaisi Autahaatiho kaito tati nehi windi maawinjasihiji siyihyaanangi kiya windi timaanyawopo. ¹⁰Iyataati nyahi noaipawaati aimi Kiraisihomihyaanisi kandapi koai tiwohipatamataiwi komi piwiha katawaunja awusaahohitimandapi nyami tiworisa nyangi siyihyaanangi nyawitauhi mmonaahiyaane. Ami sandi Jisaasiho nyangi neti anditinyaiwa nyaiwatihiji nyahi windi namaapowaati

asiyihyaanini bimonihisi isihiya mmoniwi gwinyaawaayopo. ¹¹ Ami nyahi asiyihyaanindaahandi kandi nyahi Jisaasihomi otipipati taawaati kawisonihisi kandapi isihiya nyangi siyihyaanangi nyawitaatiwiyohitimandi nasisoari deti ahondaise. Ami nyangi sandi nanyoaiipasihisi Jisaasihoni nyamihatihisi bindataati nyangi neti nehi nyahi isihyaanami ambipati napoti namasaatitandihati nyatatamanati anditinyaisitimandapi isihiya mmondaatiwe. ¹² Aihisi ami nyahi taawaati nyami ambipati maariho yaasihaiwa ami nyahi maanihisi napowaati windi namaasihaataati taawa nehaayo. Ami nyahi taawaati siyonihandi kandi sahi asitimatitaatiwihandi wani taawi newaayopo.

¹³ Nyahi Autaahaatihopi giwunyaahaayo utaaho wo Autaahaatihopi giwunyaataati satati,

“Nini kinyapi gihunyaataati kinyi nisi tiworisaami ikwiraatihapi tinjaapi japihi nanimaitaapi nangisenataayo,” *Aunihihiri 116:10* tati jipatipaipatamatiyato. Ami sikireti ko (Autaahaatiho) nyangi nyatatamanati anditinyaiwitaihi giwunyaawaati ami isihiyaisi piwiha Kiraisihopi kiyaaninihi kaundihaato. ¹⁴ Nyahi sandi kiyohitimandi siyaati mmonihaawe, Autaahaatiho nyami Awaisihoni Jisaasihoni napomasihisi japihi ahowimati ami Jisaasihoaaisaati nyahi maasi bimitihaawi nyahi napwisaihi japihi ahonyimahonihisi nyahi nahatiyaani maasi komi ndimaahomwaaŋi noaipaitihaahandapi mmonaati gwinyaahaawe. ¹⁵ Iyataati saiwa nyami ambipati (maariho) yaasihaiwa sahi gaahandi nepi itatamanindaatiwi nyahi Kiraisihopi Autaahaatihomi piwiha sangisuni ami isihiya nahatiyai nahataapipihisi ausaawa kaundaati kataawaunjohiyihyaanangi nanyoaijataise. Ami sandi nyahi kaitihaawi Autaahaatiho maaritataise. Ami isihiya taahiyihiya piwiha Kiraisihopi nyahi kataawaunjohiha atiwi Kopi giwunyaasaihi kiya wapa kamaiwi nehihandi Autaahaatiho kiyaami maipihaiwa nemwahonihisi ami kandapi isihiya taahiyihiya koai gaahone undiwi komi ambipati nepi mepi autaahepumaitaatiwo.

Autaahaatiho Isihiya Otipipatapi Natausaasisawihiya Kopi Giwunyaahotihanda Daiwi Bitotawaayopo

¹⁶ Ami sandi isihiya wapa kamaiwi nehi kiyaami maipihaiwa nemwaitandi kiyaami aunahipa neti Kiraisihoni komi ambipati maariho yaawihandi neti napwindihandapi Autaahaatiho kiyaami maipihaiwa nemwasihisi ami piwiha kimikandapiha nyahi windi yamaayaati isihiyaisi kataawaunjahaayo. Iyataati ami nyami ambipati nehi yamaati tiwathihaatihati isihiya tipi namaupwi yaasihandi nanyinyawaayopo. Sanyisauhihandi kandi nyami omanjititihisi maariho asisihani nehi naasi naaseti taati watipitahi asohoematataise. ¹⁷ Iyataati ami wani nyahi nehi masehonjeti ambipati yaasihaiwa nehohipimba wapa awaimbipaamaahe.

Owe. Sandi nini apaapimaato. Ami wani nyami ambipati yaasihaiwa nanyoaipasiwimaiwai nusatipihaati apipaahi awaiwaiwa gaahaiwa Autaahaatiho yamihapataatihi nanyamitandihyaanitihi. ¹⁸ Aihi ami nyahi nyami ndiha wapa auta ahotihi mmohohipipeti mwitipisaati kapai iwinjatihaamaayo. Owetise. Nyahi nehi wapa yamihapataatihi nyami ndihaara windi mohonihi koaisati ahotimbipaapaahihi gwinyaahaayo. Iyataati nyangi nyami ambipati maariho yaasihandi wapa taati nanyoipasihhi mmonaati nehohipipaapi nyahi gwinyaahaamaayo. Owetise. Iyataati sandi nini apaapimaato. Ami nyangi wapa nanyoipasihhi nyahi mmonaati nehohipipa sapaahi nehi masihonji ahotinjati keti owetitaise. O ami nyami ndihaara wapa auta windi monihohipipa Autaahaatiho nyangi nanyamitandihapa yamihapataatihi ahotimbipaahi kapaanihi ahotitaise.

5 ¹ Kimaapi yapimbatambi nyami ambimaiwaahi anjaani gohparihaanamatiyahaiwaare. Isi ami ambimaiwaahi gohparihaiwaasi nosasinati owetitaise. Nosasinati owetonihhi ami Autaahaatiho ambipati apipaahi watipihati wanihati wipetahati Autaahaatiho sawaho kiyahati nanyamitaise. ² Nyami ambipati yapipatambihatisaati bindihaawi ponyatati nyatihinyinjihhi Autaahaatiho ambipati gaahati naanjihaiwa namehathi watipihati yamihapataatihapihati nanyamitandi maaritaati jatimi nohaayo. ³ Ami nyahi sati ambipati watipiti apotihiramatiyaati newaati biyaati nipaatihaawaahi windi somaahiyihyaanimetitihawe. ⁴ O ami wani ambimbati kimati gohparihatisaati bindihaawi naanjanyisati yaasihhi nehosisaati bindihaayo. Sandi ami katotimandi nyami ambipati kimatisaati napowaati kati namaitihaawo ndaamaato. Owe. Ambipati watipihati yamihapataatihapihati newaati apotihiramatiyaati niyoaitihaawihandapito. Siyati nyami ambipati kimati noaipati nepemaitati ambipati wanihati apipaahati yamihapataatihapihati katinihhi ahotimi nutandihatimatitandihatapito. ⁵ Autaahaatiho nyangisi japihi nanyamaati nyatatamanati nyamanataise ambipati watipihati yamihapataatihapihati nanyamitando. Iyati ami ko Itipihho Gaaho aimi nanyinyataise. Itipihho Gaaho so Autaahaatiho nanyamiso ipotihura nahataapa gaahapa akiti nasamito tati jihapihapaamatiyaho nanyinyataise. Isi ami wani Kiraisihho isihiyai maariho numwindihandi mmonihohurimuraapi nyahi siyaati windi gimunyaaho.

⁶ Itipihho Gaaho nanyamisiho ko nasisoaari sandapi neti ginyunyaasihhi ginyunyainjihhi Autaahaatiho sandi akiti kaitaise taati nyahi gwinyaahaayo. Iyataati ami nyangisi aimi ginyunyaatataise nyahi kimati ambimbatisaati bimohurimura nyami Awaisihoaisaati maasi bindihaamaayo. Owe. Nehi ambipati yamihapataatihapihati sawaho nanyinyonihhi nesihuraahi maasi koaisaati bimitihaawi wanihi

nyangi yandihi bindihaayo. ⁷Nyahi Koaisi nyami ndihaara windi mausonihahandi kandi taawaati giwunyaawaati bimaami nohaayo. ⁸Nini aimi kato. Nyahi sandapi akite taati Autaahaatihopi giwunyaawaati ami maaritihayo ko ambipati watipihati yamihapataatihapihati nanyinyonihi ambipati kimaapi yapimbatambihati namasisi ambipati yamihapataatihapihati nesisi yamihapataatiji Awaisiho Jisaasihoaisaati maasi bimitihaahandapo. ⁹Isi sandapi nyahi kimaapi yapimbataapihi nyami ambimbatisaati bindihaawisangisi ami ambipati watipihati yamihapataatihapihati newaati Jisaasihoaisaati bindihaawisangisi Komi maaritati gwinyaasirihireti mmonainjaati kaimi nutihaawe. ¹⁰Sandi ami apaapimaato nyahi ambipati kimaapi yapimbatambihatisaati bindihaawi Komi gwinyaati maaritiwaiwa kiyaati ami Komi maarimitiwaiwa kiyohiwaiwaapi komi ndiheti noaipawa bitosaihi ko tipitapaati nyasonati maipihaiwa kiyohiyihyaanangi kandapi wihoanjihandi nanyinyati ami gaahaiwa Komi maaritati gwinyaasiwaiwa kiyohiyihyaanangisi ami kandapi wihoanjihandi nanyamitaihto.

Isihiya Kiraisihomihetapi Autaahaatihomi Naisihyaimatawaapo

¹¹Isi ami nyahi Awaisiho Jisaasihomi ndiheti bitoitihahyaaniso taati gwinyaahaawi Komi maarimitiwaiwa kamaayaati ami nehi Komi maaritati gwinyaasiwaiwaahihi napaitaati kaitihaawo. Kiyaati Komi piwiha atiwiisaati komihatihi sanowaati bimitihaawo. Iyaati ami isihiyaisi sandapi biyati giwunyaatati nusesipatonih giwunyaitaatiwi kaunditihawo. Iyataati nyahi sangisi piwiha titihi akitinihi akaaha kasatohaato Autaahaatihoisangi titihi akite tati nyasosho. Nyahi aimi gwinyaahaayo, sahi nyami piwiha aimi kasatohihaapi piwiha akaaha kanyatawaatopo tiwi aimi gwinyaahauho. ¹²Nini sangisi kasatotimandi sahi nisapi ko utaaho gaahoe tiwi nisoniwi gwinyaitaatiwi kasatataamaato. Owetise. Isihiya nyapi sisaiwi kaiwihiye, o nyahihi gaahiyaane tiwi sawana naimaatiwi Autaahaatihomi maarimitiwaiwa kaiwihiya kasatohiyihiyaisi nyapi kiya saiwi saiwi gaahati kaiwihiye undiwi nga kaunditaatiwi kasatataato. ¹³Nyahi Autaahaatihomi piwiha nasisoari pihitaati ausaapi niyohitihandapi sahi nyapi satiwi siya nasisoari pihitiwi piwiha katimi niyowi nahariho numwaasihi naharitiwitowo tiwi katawaawaahi ami nyahihi piwiha ausaapi nuto, Autaahaatihu kimikati kaitihaawi natanyoasihihyaaniso. O ami sahi nyapi kiya gaahati kaiwi piwiha ausaawaayopo tiwi gwinyaapi katawaawaahi ami sandihi nge, ami sapi sangisi anditisaiwitihawo otipipati kiyahaayono. ¹⁴O ami sandi apaapimahe, Kiraisihomi maariho nyangisi nanyamindihandi sandaahi andititaati piwiha ausaahaayo. Ami nyahi siyohitimandi Autaahaatihu isihiya nahatiyaami maipihaiwaapi wihoanjihandi kiyaisi numwitotihandi

nahatiyaamihandi namati Jisaasiho naasohi kiyaami aunahipati neti napotaise taati aimi gwinyaahaawe. Siyati Kiraisiho isihyaami aunahipati neti napwindihandaahi sawana kiyaami maipihaiwaapi napwauhihandamatiyati kiyaami maipihaiwa Autaahaatiho ami nga nemwataise. ¹⁵ Isihya nahatiya kiyaami maipihaiwaapi napwitotiwihyaasi namati Kiraisiho kiyaami aunahipati neti napotaise. Isi Jisaasiho kiyaami maipihaiwaapi napwihi kiya namaapopi bimohiyihya kiyaami maaritiwi gwinyaahohirihireti daiwi japepihiriwi kaiwi bimitaatiwimahe. Owetise. Kiyaami aunahipati neti napotati japihi asohoematati nepasihomi gwinyaati maaritirihireti japepihiriwi kaiwi bimitaatiwe.

¹⁶ Iyataati jihura nyahi Kiraisihopi sangi giwunyaahohura isihyaami maarihoatihi mausonaati nehi yamaati ambipateti kiyohiwaiwa tipitapaawaati usonaahiyaane. Iyataati ami jihisangi sikireti Jisaasihopi sangi giwunyaahohuraisangisi Jisaasihopi isihya windi moniwi gimunyaapihiya maariho jihomihireti kiyohirihireti kiyaati tipitapaawaati usonaati ami kopi nyangisi japihi nanyamaitandi Autaahaatiho namihanati ahiwisihoe taati windi gimaawunyaawaahiyaane. Isi ami wani Jisaasiho isihyaisi maariho numwindihandi aimi mmonihaayoni siyaati windi gimunyaitihaawe. ¹⁷ Isi ami isihya usa Kiraisihopi giwunyaapi koaisawi kiya timaamaitawaawaahi siyaisi Autaahaatiho neti apipaahi wanihiyemataise. Autaahaatiho siyati neti wanihiya wipetahiyemasih i kiya jiji bimohimumwaanji namaposawi wani kiyai wamwaanji wanihamwaanji kaiwi bindawaayopo. ¹⁸ Autaahaatiho sandi kanyisati wanihiyaanenyamataise Kiraisiho nyami aunahipati neti napwindihandaaho. Siyati Komi napwindihandaahi nyahi Autaahaatihoaisaati tiworisaanimataati bimonihyaanangisi neti Autaahaatihoaisati nyamaamahiwaitaise Komi naisihyaanimatitahaawo. Aih i Autaahaatiho nyangisi natanyoasataise, nyahi isihyaisi komi piwiha kaunditahaawo Autaahaatihoaisawi kiya maariho naasohitanih i maasi koaisawi napaisaati bimitaatiwihandapo. ¹⁹ Autaahaatiho nanyamihanati natanyoasisawihyaanini isihyai piwiha kaunditahaaha siyahaare: Autaahaatiho Koai natausaasihi kimaapi yapimbataapihi nasati nyami maipihaiwa komiheti naihi ko nyami aunahipati neti napotaise. Kouni isihya yapimbatambihiya japihi timaamaitiwi naisomwaitaatiwo. Saiwi noaipapi komi naisihyaimatisaihi ko kiyaisi sahi maipihyaate munditando. Aih i nyahi sandapi yapi nahanda daayaati Autaahaatiho piwiha isihyai kaunditahaaha kanyatisiha ka sataati kaunditahaawe: Autaahaatiho Kiraisihoetapi daihira gaahira daahiwati kiyataise, isihya noaipapi titihi Autaahaatihomihyaimatitaatiwo undaati kaunditahaawe. ²⁰ Aih i nyahi Kiraisihomi piwiha nesi yapihi

nahanda daayaati ausaawaati kaunditihahiyaane. Nyahi Kiraisihomi piwiha katawaunjonihimi ami Autaahaatiho sawaho nyamihetapi Komi watipihandisa isihiyai piwiha watipihahi kaundataase. Aihimi ami nyahi isihiyaisi sataati kaundihaato: Nyahi sangisi watipitaati sata kasatihaato, sahi Komi tiworisaatimatiwi windi bimimaawise. Owe. Sahi titihimi akitinihi Autaahaatihomihiaatimatiwi bimaawise undihaato. ²¹ Kiraisiho so maipihaiwa windi kamaayati utaahe ainahiho gaahoi Autaahaatiho nyami maipihaiwa nahatewa neti Komihetemasihimi ko maipihaiwa kiyahomatiyati nyami maipihaiwa nesi nyami aunahipati neti napwindihandaahi Autaahaatiho nyami maipihaiwa nahatewa nenyamahonihi noaipawaati gaahiaaninitisaihi nanyamaahonihi noaipawaati titihimi komihiaanimatitihawo.

**Autaahaatiho Komi Otipipati Kawitaatiwi Nunyati
Natausaasisawihia Naanijhaiwa Newaayopo**

6 ¹ Nyahi apipaahi watipitaati sangi sasatihaato: Ami sahi Autaahaatihoai nunjenihauhi ami Autaahaatiho maariho asipisisati gaahandi nehihandi kasisati ami sami maipihaiwa nesamasi ami sahi komi gaahandi kasindihandi windi namaamapi kiyaatinihi isiwatiwi kopi giwunyaapise. ² Iyataati ami komi piwiha wa aimi jipatipindisihatihapi Autaahaatiho satise. “Sahi ningi nanisenihauhi ami nini sami gapipa atisisataayo. Atisindi sangi japihi nasamaitandihoi neti nini nandusoasataayo,” tati katise. Aihimi ami nini wani sahi nahatiyaatangi sasataato: Wani kimura Autaahaatiho nyahi isihiaanini nahatiyaanangi japihi nanyamaitandi timendaise satataato.

³ Aihimi nyahi wapa titihimetihapa kapaaraahi isihiyai newa niwisapusaihi ami kandapi nyahi Autaahaatihomi piwiha katawaunjohihaapi kiya piwiha maipihahi katitaatiwihapa windi kamaayo. Owetise. ⁴ Ami nyami piwiha ami nyami dahopa ami wapa nahataapa anjini titihimi gaahapa gaahiaani piwaataati daaya kiyaati bitotihaiyo. Siyahaawi siretapi isihiyaisi nyahi Autaahaatihomi otipipati napaitaati akiti nga kiyahaayo undaati newa nunjihaiyo. Kiya nyapi satiwi, “Kimiya akitinihi nga napaitiwi Autaahaatihomi otipipati kiyawaayopo,” tiwi mmoniwi gwinyaitaatiwo. Aihimi isihia usa nyangi pohirinyatiwi kahapaamapipa nyami ambipati yaasihaiwa nyapi kiyauhahandi kandi daahi nambitaati watipitaati kaiwa newaati bitotihaiyo. Iyaati ami nyami maariho amitiha yaasati nanyinahaiwa isihia nanyinyauhi nanyoai pasihimi pihitaati waati waati gwinyaawaati ami isihia wapa kihihooanjapi nepi nanyisapupwi kiyauhi ami nyami maariho amitiha niwipinyimatati kaihi ami nyahi wapa kaitihaahapaapi windi biyati gimaanyunyaatati naharimatataise. ⁵ Iyataati isihia nyami ambipati apipaahi yaasihaiwa nepi yainyupwapi ami nepi winyairapi nanyapupwi

ami isihiya wirisandihandi nyapi apowihhi nepi nyahamaniwi nanyisapupwi siyihyaanangi nyawitaatiwiyawaayopo. Iyauhi ami nyahi dipipatisaati otipipati watipihaiwa kiyaati ami nyahi windi naapipa biyaati namowaati ami nandapa nyahi nandihaahapa taahipipa owetati sanyimatataise. Saiwa siyati nyangi nanyoaipasihandi kandi nyahi Autaahaatihomi otipipati napaitaati kiyaati kawisihaaayo. ⁶Iyataati ami nyahi titihi gaahiyaani saasanotahiyaani ami akiti akipipa kiyahaayo. Iyataati nyahi kaitihaawi Autaahaatiho gwinyaati maaritimbipa nyahi mmonaati ami isihiya nyangi nepinyamapi pohipinyisohiyihyaapi windi apomaanyati ami nehi gaahatihi isihiya nahatiyaisi ahoyaati kawisihaaayo. Iyaati ami Autaahaatihomi Itipihho Gaaho nyangi neti anditinyaisihi ami isihiyaisi nyahi maariho akitinihi nunyihaawi saiwa nyahi kiyahaayo. ⁷Iyaati ami Autaahaatiho nehi sawaho nyangi neti anditinyaisihi ami komi piwiha nehi akitihaahihi Kiraisihopitiha isihiyaisi nyahi nasisoaari katawaunjiaayo. Isihiya nyangisi maipihandi kiyawaayopo maanyatitaatiwi nyahi matoaatipatamatiyaati newa napopitaati nehi anjini titihiyaani Autaahaatihomi piwiha katawaunjaati ami nyahi wapa kiyohipipaapi sapa titihihapaamaahe tohiyihiyai kapaami wihoanjihapa kaundihaato. ⁸Saiwa nyahi nyami mitiho nusoasawaamaati ami isihiya usa nyami ambipati nanyimaawaawi ami isihiya usa manditipinyisauhihandi kandi kiyaaninihi taawa kiyahaayo. Aihhi ami isihiya usa nyapi piwiha gaahaisangi ami maipihaisangi katiwi. Aiwi ami wapa nyahi akitihapa Autaahaatihopi kawisohipipa kapaahihi kawisonihandi kandi isihiya nyapi, “Kiya jaipipa katawaatopo,” tawaatopo. ⁹Aiwi kiyaami usa nyapi Kiraisihomi natausaasihi komi piwiha nesi napiwihyaare tiwi maahoaipupwinyamapi manditinyaipi windi gimaanyunyaahopo. Ami kiya siyauhiihandi kandi ami Kiraisihopi giwunyaahohiyihyaahi nyapi nga maarihi nyasonawaayopo. Iyaati ami nyahi Kiraisihomi piwiha isihiyai katawaunjohitihandapi isihiya nyapi manditinyisohiyihya nyangi nyawisaihi napwitihaahandisaati maasi daayihaaayo. Siyahaahandi kandi ami Autaahaatiho kiyai nehi windi maawinjasihi nyangi windi nyami tiworisa timaanyawauhi nyahi asiyihyaanitihaayo. Wapa wirihiri pwisipati watipihapaara waati ambipateti nepi nyapi yaasihaiwa yainyupawaahandi kandi windi siyihyaanangi tipimaanyamahopo. ¹⁰Iyataati ami wiweti isihiya nyangi nyasonawaawi nyahi maariho tundahiyaanamatiyaati bimonihhi nyasonawaayopo. Maariho tunda asipiwisaahiyaanamataendaahandi kandi Autaahaatiho nyangi anditinyaiwitandi winjatimi nohaawi nyahi nasisoaari maaritihaayo. Maaritaati ami nyahi wapa taahipipa owehiyaanitihaahandi kandi nyahi isihiya taahiyihiyai newaati Autaahaatihoaisaati timaamaihonihi ami Autaahaatiho komi isihiyaisi kahapaamapipa nahataapa numwimbipa kapa nahataapa kiya

newaayopo. Iyataati ami nyahi yawanaanamihapa owehiyaanitihaahandi kandi ami Autaahaatiho komi isihiyaisi gaahapa ipoti yamihapataatihi numwitandi watipitati jihi timanati katati wisasati ahaimbipa nahataapa nyangi nanyamihi nyahi nehaayo.

¹¹Nyahi wapa namwaasaati nahataapa titihi akiti sahi isihiyaati Korindihandaahiyaatangi kasatihaato. Iyaati sangisi nyahi sasata: nyahi sangisi maariho waati nasanyihaayo satahaato. ¹²Nyahi sangisi nyami maariho windi namaasanyihaamaayo. Owe. Nyahihi sangisi awaindihandi pihitaati maariho nasanyonihandi kandi nehi sahihi windi nyangisi sami maariho windi namaanyanyopo. ¹³Nini sapi kimandi utipimandi jipatipiyataati utaaho wo komi manyinyai pihitaiti awaindi maariho nunyaho kiyai kaundipatamataindi nini sangi sasatiti: nyahi sangi maariho nasanyohipatamataiwi sahi nyangi sami maariho nanyinyawise satataato.

Isihiya Kiraisihomihiyauni Bwaasirihiramihiyauni Timaamaamaitiwise

¹⁴Isihiya Kiraisihopi gimaawunyaahohiyihiyaisawi sahi Kiraisihomi isihiyaati windi timaamaamaitiwise. Ami sandi nini apaapimaato. Isihiya titihi gaahapaahihi kiyohiyihiyauni ami isihiya wapa titihimetahapaahihi kiyohiyihiyauni maasi timaamaaitiwi wapa kiya kaitaatiwihapa apipaahi owetamase. Ami sa nini sandi kandaato: isihiya Kiraisihomihiyauni ami Bwaasirihiramihiyauni nutasi maasi nga daiwi bimimitaapo. ¹⁵Ami Kiraisihohi Bwaasirihiri wapa kaimbipaapi windi maaritaiti gaare maatahore. Apipaahi owetise. Isi ami utaaho wo Kiraisihopi giwunyaasiho ami utaaho wo Kiraisihoai pohipiwisihoaisami noaipapi timaamaitimi wapa nga kamaitaise. ¹⁶Ami siyati Autaahaatiho isihiyaisi nehi windi maawinjasihi komi aji awaindihandaatihi autaahaatiho jaipitahoai windi mepi autaahepumaamahopo. Isi ami siri kireti nyahi Autaahaatihopi giwunyaahohiyihiyaanini isihiya usa kopi windi napaitiwi gimaawunyaapihiyaisa maasi timaamaamaititihaawo. Iyataati ami sandi nini apaapimaato. Autaahaatihomi isihiyaanini nahatiyaanini Autaahaatihomi añaanamatiaahiyaaninitihito. Nyahi Komi añaanamatiaaati noaipahaayo. Kimandapi Autaahaatiho komi piwiha wapihi jihi jipatipindisihaatihapi satise.

“Nini kiyaisati bimaati ami kiyaamihatihiti daito. Nini noaipati kiyaami Autaahaatihoninitisanihiti kiya ningi mepi autaahepinimapi ami nisi otipipati kanitaapo,”

Aisaiyaaho 52:11; Isikierihio 20:34, 41

tise. ¹⁷Isi ami sahi Autaahaatiho komi piwiha jipatipindisihaatihapi sata katipatamataiwi kaiwise.

“Sahi isihiya usa nisihyaametiwihiyaami otihatihapi noaipasi sangi yandihi nawisawi bimaawise. Maipihapa kiya kiyohipipa

sahi windi kamaiwise. Sahi nisi isihyaatimatitaatiwi sangi nini nasamaitaano. ¹⁸Nasamaati utaaho wo komi mwaaya maatiyai maariho numwipatamataindi sangi nini maariho nasamisanihi ami sahi noaipapi nisi maasihoyaati maasihaasihyaatimatitaatiwo. Awaisiho apipaahi watipihho isihya nahatiyai si winjatisiho satati kandaase.” *2 Samweriho 7:14, 7:8*

7 ¹Isi ami nisi naisihyaati nisataiwi Kiraisihopi giwunyaahohiyihyaati ami nini nisi maariho sangi nasanyohiyihyaate. Ami Autaahaatiho noaipati nyami apihoematitandi piwiha jihi watipitati timanati katisi nyahi wapa maipihapa kamaayaati namaitihaawo. Namawa wapa nyami ambipataahisangi ami nyami amitihaara gwinyaawa Autaahaatiho maarimitihapa kiyohipipa kapaanihi namaitihaawo. Iyaati nyahi nasisoaari kiyaaninihi maipihapa kaitihaawi ginyunyainjipapai newa tiwandaati ami Autaahaatiho apipaahi popitihho gaahosi ami nyangisangi sikiyaati ainahiyihyaani popitihyaanini bimitihaawo.

Korindihya Japihi Nepemaitauhi Poriho Maaritaise

²Sami usaatangi mimaipisisaahapa wapa nyahi kamaasiso. Iyaati ami sahi maipihandi kaitaatiwihira daihira ahisisihaamaayo. Owetise. Nyahi windi siyaati kamaayo. Iyaati ami sami usaatangi nyahi windi jaipitaahapa kamaasato. Isi ami sahi nyapi satiwi: kiya akitinihi Kiraisihomi otipipatihyaaso tiwi ginyunyaapi ami sami maariho nyangi nanyinyawise. ³Iyataati sapihi nisi katohiwiwa piwiha neti samiheti yasutaitandi sandi kandaamaato. Ami sami usa nisapi saiwa katauhihandi kando. Iyataati aimi jihi sapihi kasatohihaare. Sahi nahatiyaatangi nyahi maariho nasisoaari nasanyihaayo. Isi maariho nasanyohiho konihi nyahi nasanyami napowaato ami asiyihyaani bindihaawo kiyaaninihi nasanyami nuto. ⁴Nyahi sangi siyaati nasanyihaawi nini sapi maariho yiyahwi windi gimunyaaho sahi apipaahi akiti nyangi maariho nanyinyawi ami nepi autaahi nyaiwatitauho. Aindi nini sapi isihya kiya apipaahi gaahye undataato. Ami sandi apaapimahe. Sahi nyangi nepi anditinyaihauhi kahapaamapipa nyangi neti nanyopisasihaiwa nanyoapasihi nehaahandi kandi nini maaritataayo.

⁵Wani kima piwima nini Taitusihopi daapi niyo tohihaamihare. Nyahi piropinjihandi Masetoniyaahanda nowa noaipawa bindihaawi nyami ambipati maariho windi nanyipipaitati wimaanyinje. Owetise. Kapihisangi wiwa neti mimaipinyisati nanyopisasihhi maariho windi wimaanyinje. Owe. Ami nyahi wihoanjewamawa Kiraisihopi piwiha katawaunjito taatyonihi ami isihya kapi kapihemapi nyangi nepi nanyisapuwawaayopo. Aiwi ami isihya windi nehi

maanyinjapi kahapihemapi kiyaanihi nepi nyaipindiwuni ami nyahi sapuni ami Kiraisihomi isihiya usaapuni waati pihitaati gisunyaahoatohaawi nyahi maariho windi wimito. Owetise. ⁶Ami saiwa siyati nyangi nanyoapisihandi kandi Autaahaatiho isihiya usa kiyaami andititohitihandi yatihiwinjahi yayauhihiyai nasisoaari neti anditiwihahosi ami nyangisenda Taitusihoai japihi neti natausaasati koetapi nyangi neti anditinyaiwataise. ⁷Iyataati ami nehi Taitusiho nyangisenda japihi napindihandaahihi nyahi japihi andititaati maariho witihaamaayo. Ami sahi koai wapa nunyawu kawiwi komi maariho nepi yatihiwipi anditiwihohipapaapi maawi kanyatihe. Iyati ami sahi ningi nisondaatiwi maaritohitihandapi kanyatati ami samihatihinoaipasiwaiwaapi sahi akitinihi maariho asipaiwi tibatindihandapi kanyatati ami sahi nisihioaani napiwi ningisawi maariho naasohitanihi timaamaititahaawi gwinyaahohitihandapi maawi kanyatataase. Aihi ami Taitusiho saiwa sapi kanyatindimandapi nini apipaahi aungwohandi maaritataayo.

⁸Iyataati ami piwiha nini nisi utipihohi sapi jahi nusoasohoaatihi kasatohihaapi sami maariho yaasihi ami sahi maariho asipiyawaayopo. Ami nini piwa saindi sireti sangi maariho yaasahireti jipatipiyohitindapi nini windi maariho asimaayo. Sandi nini apaapimaato. Utipihohi so nini sapi jahi jipatipiyohi sahi nepi awitawaawi sahi windi maarimitopo nisi piwiha kasatohiwiwaapo. Iyataahandi kandi nehi masihonji sangi maariho yaasati maariho asipisisataise. Ami sikireti sangisi sasimatitaihi nini mmonataati nisangi wonji maariho asipiyataayo. ⁹Iyataahandi kandi ami wani nini maaritataayo. Ami sahi sami maariho tibatati yaasihi maarimitohitindapi nini windi maaritataamaayo. Owe. Ami sahi sami maariho tibatati asipiyawaawi sahi daihira maipihira piniyohitindapi Autaahaatiho sami maipihandi nesamaitandi nunjenihauhe. Iyataati ami sahi maariho asipiyohitindi sandi ami Autaahaatiho gwinyaati maaritirihireti sahi kiyawaayopo. Aihi ami nini utipihohi piwiha jipatipiyohaara sangisi neti nini mimaipisindi namaasopisaso. Owe. Nini sangi neti titihesama ami jatatamanataayo. ¹⁰Iyataati utaaho wo maipihandi kiyatosa kandapi akitinihi komi maariho tundati ami koai mawitandihandi Autaahaatiho neti giwunyaahosi ami neti koai giwunyaahonihi ko komi maipihandi Autaahaatiho nemwaitandi nunjendaise. Nunjehonihi ami Autaahaatiho utaasomi maipihandi nemwati ami ko konihi komi ambipati maariho yaawihandi netoatitandihapihapi japihi numwaahonihi ko utaaso komi maipihandapi windi maariho asipiyati gimunyaitaise. Owetitaise. Iyataati ami isihiya usa kiyaami maipihaiwa kiyohiwaiwaapi maariho tundihi asipiyawaahandi kandi kiyaami maipihaiwa Autaahaatiho nemwaitandi windi baiwi gwinyaapi namunjehopo. Namunjehowi ami

siya Autaahaatihoaapihapi yandihematiwi maariho ambipati waati yaawihandi kiyaanihi nasisoaari nepi bimitaatiwihapihapi nutaapo. ¹¹Ami wani sahi sandapi mmoniwise. Sahi akitinihi Autaahaatiho maaritirihireti sami maariho asipiyawaayopo. Aiwi nehi kuraanihi sahi isihiya wapa titihimetihapa kiyohiyihiyai kapa namapise undiwi pihitiwi kaundawaayopo. Aiwi sahi sandi saiwi titihemahohitimandi ningi kandisaihi mmondandi sahi maariwi kiyawaayopo. Aiwi ami sahi satiwunyaapi ami wiwa Autaahaatiho nyahi nahatiyaanangi yaasihandi nanyamitaiso tiwi isihiya maipihapa taawi kiyohiyihiyaapi sahi windi apipaahi maarimitopo. Ami nini saindi nasataati sahi akitinihi Autaahaatihoai atiwiji komi asimwaatitihini pinutaatiwiyohitihandi nini mmondando. Aiwi ami sahi isihiya titihimetihapa maipihapa kiyohiyihiyai tariwaiwi keti wihoaanjihandi yaawihandi nunyawititihemawaayopo. Saiwa saiwi sahi kiyohitimanda ningi sahi saiwi nepi nanisawaayopo: nyamiheti saiwa titihimeta maipihapaapi piwiha ahimotati ainahiyihyaane ndiwo.

¹²Aihi ami nini sapi utipihohi jipatihiyo nehi utaaho maipihapa kaisihoai sahi nepi titihewapapise satitandimahe. Aindi utaaho maipihandi kiyati kandaahi neti woai nusopisisiho neti itatamaninati titihematitandihandapaahimahe. Owe. Ami sahi nisi utipihohi awitawaawi ami Autaahaatiho nyangi nyainjatataiso tiwi gwinyaapi ami sahi sawanaati nisapi Autaahaatiho komi isihyaanangi nyainjatitandi watipihandi otipipatisati nunyati natausaasihohoso tiwi ningisi nepi autaahi niwasohitihandapi sangi biyati gisunyaatonihini sahi mmondaatiwe. Aiwi ami isihiya ningisawi maasi otipipati kiyohiyihiyaami watipihandapisangi kimikireti mmondaatiwe. ¹³Iyataati saiwa sahi saiwi kiyohiwimaiwaraahuni ami sahi wapa kaitaatiwi kasatohipipa atiwiji kiyohitihandaahuni sahi nepi nyami maariho yatihinyipi nyangi anditinyaiwawaayopo.

Ami sandi nehi nyangisaahihini anditinyipi nyami maariho nepi yatihinyiwawaamaayopo. Ami Taitusiho sangi noti jainjati maawi bimisura koai nepi yatihiwipi anditihauhi ami ko maaritaho nasati nyainjasihi ami nyahi nyami maariho usaanyinjihini maaritahaayo ami sahi Taitusihoai saiwi sangi maariho akitinihi nasanyihahaayo undiwi nunjauho. ¹⁴Ami sapi nini Taitusihoai saunditi kiya Kiraisihomi isihiya apipaahi gaahyaare unditi jihini kaundohihoe. Isi ami sahi koai kawisohipipa nini sapi koai piwiha kaundohirihiri kireti kawisawaayopo. Kawisawaawi nini sapi maariho naanjanisonihini windi maarimitandihapa wapa sahi kamaayopo. Owetise. Ami sikiyati nyahi nehi akitihapaahihini nasisoaari kasatohirihireti sapi gaahapa Taitusihoai kaundohipipa sahi kireti akipipa kiyauhi noaipataise. ¹⁵Iyataati ami wani Taitusiho sangi komi maariho sangisenda sangi noti jasosura nasamimumwanga nusatipihahaati

autaahi wamwaanji komi maariho sangisi nasanyati ami sangi neti autaaheesamati jaiwatataise. Sandi ko sangisi noti jasosih iwitatamaniwi nepi koai autaahiwipi ami nyahi sangi wapa kaitaatiwi nasisehohipipa kapa kireti kiyohitihandapi ko gwinyaataate. ¹⁶Nini sapi waati maaritataayo. Sandi apaapimahe, wapa sahi Autaahaatiho maaritimbipa nga akitinihi kaitauhi nini mmoniti gwinyaataate.

**Autahaatihomi Isihiya Jerusaremihandanda Bimohiyihiyai
Iwitatamanitandi Nawiho Numwitaatiwi Poriho Kaundataase**

8 ¹Nisi naisihiyaate, ami piwiha wa sandi kasatitandiyo. Isihiya yapipati piropinjihandi Masetoniyaahandaahiya Kiraisihopi giwunyaahauhi ami Autahaatiho kiyaisi apipaahi gaahati kawisati iwitatamanati winjatindihandapi kasatataato sahi gwinyaitaatiwo. ²Kiya Masetoniyaahiya apipaahi awaindihandi naanjihandi newaayopo. Nepi kiya kahapaamapipaapi apipaahi nausetitiwi nenoaahitowimapihiya bindawaayopo. Saiwi kiya nenoaahitiwi bindawaahandi kandi ami kiya isihiya Kiraisihopi giwunyaahohiyihiyai kahapaamapipaapi nenoaahitohiyihiyai nawiho kapa numwitaatiwi apipaahi awaindihandi maaritawaayopo. Maaritiwi nenoaahitiwi bimohiyihiyai numwitaatiwiho nawiho waati ahoyawaayopo. ³⁻⁴Isihiya nenoaahitohiyihiyai numwitihamwaanji ahotihandapi kandi waati mitaahi nahataapa pihitiwi nunyawaayopo. Sandi nehi kiyaisunyaapi kiyawaayopo. Nunyawu ami sawanaapihonya goti yahonya isiwatawaayopo. Siyauhi nini kiyai usonataati sangisi kasatataato. Ami kiyaisi sahi saiwise undiwi isihiya usa kamundiwhandapi kandi kiyai sawana apipaahi andititiwi watipitiwi sahi nyangisi ayenyatiwise ami nyahuni Kiraisihomi isihiya usauni maasi Autahaatihomi isihiya nenoaahitohiyihiyai piropinjihandi Judiyaahanda bimohiyihiyai nawiho numwitaano nyatawaatopo. ⁵Aihi ami nyahi kiyaapi samwaanji ahoaiwi nanyamitaapo taati jatohimumoaaji nusatipihapi waati mitaahi autaahi wamwaanji nanyinyawaayopo. Iyataati kiya saiwa sangi kaiwiwatawa jiji Awaisihoai sawana nunyaniwosawi ami nyamihihooaji bitotawaawi Jisaasiho gwinyaati maaritirihireti japepihiriwi kiyawaayopo. Aiwi ami kiya napiwi nyangisawi maasi timaamaitawaayopo. Kiya sandi saiwi kiyohitihandapi apaapimahe, nyahi saitihawu Autahaatiho gwinyaati maaritataise tiwi gwinyapenawaawe. ⁶Jiji Taitusiho sangisenda nasati maasi bindawaawi isihiya Kiraisihopi giwunyaahohiyihiyaisi maariho nunyawu gaahati kawitaatiwhandapi saiwi saiwi kaiwise satati namasati jiji kasatihi nawiho nepi ahoyawaayopo. Aihi ami wani nyahi Taitusihoai watipitaati kaundihaato ko japihi nasati isihiya Kiraisihopi giwunyaahohiyihiyai maariho nunyawu gaahati kawitaatiwi nawiho ahoyohipipa kaiwi owemaitaatiwo. ⁷Sahi saiwi

kiyohiwimaiwa saiwa isihiya usa Kiraisihopi giwunyaahohiyihyaami kiyohiwaiwai apipaahi waati nusatipihaapihaiwa kiyawaayopo. Sahi saiwi waati kiyohiwaiwaapito: Sahi Kiraisihopi giwunyaapi Komi piwiha awusoapipi Kiraisihomi piwiha akaahaapipi amitiha gaaha gwinyaapipi ami nyangisi maariho apipaahi aungwohandi nanyinyawi ami isihiya Kiraisihopi giwunyaahohiyihyai anditiwipi numwitaatiwihandapi waati maaritiwihyaate. Saiwi sahi kiyohiwimaiwaaraahi isihiya usa giwunyaahohiyihyaisi nusatipihaapihaiwa kiyawaawi ami isihiya Kiraisihopi giwunyaahohiyihya nenoahitohiyihyaisi anditiwipi nawiho numwitaatiwi waati andititiwi kaiwi timetiwise, isihiya usa Kiraisihopi giwunyaahohiyihyaami kiyohiwaiwai nusatipihaapi kaitaatiwo.

⁸ Sahi isihiya nenoahitohiyihyaisi iparimatiwi numwitaatiwihandapi tariwisatataamaato. Owetise. Ami Masetoniyaahiya sandi kaitaatiwi maaritiwi aimi timetauhisato. Isi ami isihiya Kiraisihopi giwunyaahohiyihya naanjihandi nepi nausetitiwi nenoahitiwi bimohiyihyai sahi nawiho numwitaatiwi akitinihi kiyawaayopo ndi gwinyaataatitoni ami sahi satiwi nyahi isihyaisi akitinihi maariho nunyahaawi kiyahaayo tiwi nanisitaatiwi kaiwise. ⁹ Jisasi Kiraisiho nyami Awaisiho nyangisi apipaahi gaahati nehi kanyindihandapi sahi aimi mmoniwi gwinyaapihyaate. Jisasi Kiraisiho so Autaahaatihomi kahapaamapipa gaahaiwa asaketahondaahandi kandi nyapimainjihi kapai namasi maapi noaatipati noaipati kahapaamapipa owehoematataise. Ko siyati kahapaamapipa owehoematati ipi titihi atawihateti napotaise, ami nyahi kopi giwunyaahohiyihyaani Autaahaatiho komi isihiyai kahapaamapipa gaahaiwa numwitandi neti jihi turimanati ahiwimbipa nyahi pihitaati taahipipa naitihaawo.

¹⁰ Sahi nawiho ahoaiwi kaitaatiwihandapi piwiha nisi gwinyaahotiha sandi kasatataato: Kinaungwiha batihetapi so nawiho sahi jihi namasawi ahoyawaayopo isihiya nausetitiwi nenoahitohiyihyaisi numwitaatiwi gwinyaapo. Aiwi ami sahi iparimatitaatiwi apipaahi awaindahandi maaritiwihyaate. ¹¹ Isi isihiya Kiraisihopi giwunyaahohiyihya nausetitiwi nenoahitohiyihyai nawiho anditiwipi numwitaatiwi sami maariho jandosihohoyohiho ahoaiwi owemapi numwitaatiwi timetiwise. Isi sami isiwahohipipaami japepinjawu wapa sahi isihyaisi maaritiwi iparimatiwi nunyawise. ¹² Utaaho wo komi isiwatimbipaami wapa maaritati maariho naasohitanihi Autaahaatihoai nunyonaahi ami Autaahaatihoaisangisi kopi maarititaise. Siyataati ami utaaho wo wapa miwatataati wapa windi namumwihaahi saimbi namaaninyapi napaape tati Autaahaatiho windi kamundahore.

¹³ Iyataati sandi nini katohitindi sahi samapa nahataapa isihiya usaisi kapaanihi nunyawimapi sawanaatapihapa wapa ahimotanihi ami sahi noaipapi mimaipaiwi taanahiyihyaati isetitaatiwi gwinyaataamaato.

Owetise. Ami nyahi isihiya wapa kiyai iwitatamanitandihapa owehiya nahatiyai nehi naasaimumwaanji iwitatamanitandihapa numwitihaawi gwinyaataatito. ¹⁴Ami wani kimura Autaahaatihomi isihiya kiyai anditiwiwati iwitatamanitandihapaapi nausetitati owetihi ami sahi taahipipa pihitahi ahisisondaise. Isi ami wani kiya iwitatamanitandihapa owetimbipa sahi kiyai nunyawaawaahi ami ipoti wura sahi sangi jatatamanitandihapa owetanihi ami sahi taahiyihiyaati isaiwi binyaihi kiya sangi nasamitaapo. Isi wani kiya taahiyihiya isaiwi bindawaayowi sahi kiya owetimbipa nunyawise. ¹⁵Iyataati Autaahaatihomi piwiha wa komi piwiha jipatipindisihaatihi Autaahaatiho komi isihiyai jihura nandapa wapa ambihitawaawi, “kimandi napinde,” tiwihapa numwimbipaapi satati katise:

“Utaaho pihitahi nandapa asati nesihomi nandapa wapa yandihhi isipipa taahipipa windi ahimotise. Iyati ami utaaho nandapa nehi yahonyaahi asati nesihomi nandapa noaipati windi nausetimaahē,”

Japihi Numwaasiho 16:18

tati katati jipatipindise.

**Poriho Taitusihoaisuni Ami Wurisuni Neti
Korindihiyenda Natausaasindihandapihaare**

¹⁶Nini Autaahaatihoai kinyi gaahojē gaare undataato. Ami Taitusihoai Autaahaatiho neti komi maarihoatihuni ami amitihetuni giwunyaatosihihhi sapi nisatiyati otipipati kiyati neti jatatamanitandi ko apipaahi maaritihho. ¹⁷Iyataati ami Taitusiho sangi jasondandi taati napitandaandimandi kiyai usonda numwe unditi nini koai kaundonihimaahē. Owetise. Ami ko sapi komi maarihoatihapi waati maaritahi gisunyaataati kandaahi sangisi jasondandi napitandaise. ¹⁸Iyataati Taitusihoaisaati nyami naisoho woai maawi sangisenda nēwa natawausoasahaayo. Ami ko Kiraisihopi piwiha gaaha waniha napaitati ausaati Kiraisihomi isihiya nahatiya kimbihya komi ambipati autaahiwipi baiwi maaritiwi usoniwihore. ¹⁹Iyataati ami Kiraisihomi isihiya nahatiya kimbihya utaaho woai nepi namaamahaniwi nehi kimikoai nyangisati nawihho Autaahaatihomi isihiya Judaahandaahiyaapi taawi sahi ahoyohimo nesi Jerusaremhandaahapi nutihaawi namihanauhihore. Nyahi sandi taawa kiyohitimandi isihiya usaisi gaahati kawisaati iwitatamanitahaawi nyami maariho maaritindihandi auta isihiyai nēwa nunjaati ami Awaisiho Jisaasihoai nēwaati ambipati awaipati numwitihaawi sati otipipati kiyahaayo. ²⁰Iyataati nawihho taawi ahoyohimo Autaahaatihomi isihiya apipaahi gaahati kaiwi iparimatiwi taahihho ahiyauhuhosi ami nyahi ko nēwa isisi niyohiyihiyaanapi wiwa wo ikondaawo tiwi windi mimaipaiwi nyami isihiya usa gimunyaitaatiwi so naisomoai nyahi numwaahaayo nyangisati maasi nawihho nesi Jerusaremhandaahapi nutihaawo. ²¹Iyaati

nyahi biyaati yawanaani jatinaati titihi gaahati Autaahaatihomi ndiheti komi maaritirihireti ami isihyaami ndiheti ami kiya maaritohirihireti nehi titihi gaahatihahi kaitihaawi gwinyaawa kati kiyahaayo.

²² Iyataati nyahi naisoho jhaati woai maawi Taitusihoaisatuni ami Taitusiho koaisati wo naisoho maasi napitaise ndi jihi kasatohoaisatuni napitaatiwi namihanihaayo. Isi murimingwaasi sangisenda napitaapo. Iyataati so naisoho wani ipoti kasatohimo taahiwaiweti otipipati kihati kihati nunyaati nga kaisotaati nyahi tipitapaawaati usonihonihi ami ko nga watipitati apipaahi maariho nunyati Kiraisihomi isihyaapi otipipati nga kiyahore. Iyati ko sahi isihya usaisi iwitatamaniwi wapa nunyawu kawitaatiwi maaritohitihandi mmonati ami koaisangi kati kaitandi apipaahi maaritamahore. Wani sangisenda napitandi ko maaritataise. ²³ Taitusiho sopi sahi aimi mmoniwi gwinyaapihiyaate. Sangi jatatamaniha anditisaiwitahaawi otipipati ningisati samihatihahi taati kiyataise. Iyataati ami nyami naisosuri yahurapaahi aimi nini nasesipati sangi kasato. Suri nyami naisohuri nyamataimi Kiraisihopi nga giwunyaapi ami komi isihiyaisi anditiwipi iwitatamanimi kaimi ami kuri otipipati kaipataahi Kiraisihomi ambipati nepi autaahi awaindepumapihure. ²⁴ Isi nyami naisohingwaasi singwaasisi sahi baiwi usoniwi numwaapi sahi Autaahaatichoaisuni ami komi isihiyaisuni maariho akitinihi nunyahaayo undiwi nepi autemapi kingwaasi sami maariho nunyawise. Sahi saisaihi ami nyahi sapi gaahaiwa kataati Autaahaatihomi isihya kimbihiyai kaundihoasohirihiri kireti noaipahonihi ami kiya satiwi, e akite tiwi mmondo.

**Poriho Korindihiyai Autaahaatihomi Isihya Usaisi
Wapa Nehihapa Numwitaatiwe Undataase**

9 ¹ Nyahi nawiho nehiho wihooanjiho owehandi Autaahaatihomi isihya Judiyaahandaahiyai numwitahaawi aimapi taawaati ahoyohimopi nini sangi neti tariwisatiti nasisepaipati kasatitandi windi titihimetise ami sawanaati aimi otipipati satapi mmoniwihiyaatiso. ² Ami sandi nini apaapimaato ami nini aimi mmonataayo otipipati sati nawiho Autaahaatihomi isihya usai numwitaatiwiho sahi maaritiwi njahi njahitiwi nepi ahoyauhito. Iyauhi ami nini sapi Kiraisihomi isihya Masetoniyaahandaahiyai gaahaiwa taahiwaiwa kaundatoandaayo. Iyataati Masetoniyaahandaahiyai saunditi Akaiyaahandaahiya kinaungwiha batihetapi namasawi nawiho ahoaitaatiwi nepi timanjiniwi ami nawiho ahoaimi nasawaayopo unditi kaundatoandaayo. Iyonihi ami kiya atisawaawi kiyaisangi samataiwi nawiho ahoaitaatiwi taahiyihya omanjititihahi asakaiwi maaritawaayopo. ³ Iyataahandi kandi nini sapi Masetoniyaahiyai kaundohitihandi nehi piwiha taanauhihaametitandi ami sahi nawiho keti tariwaiwi ahoaiwi timanitaatiwihandapi nini

maarititi gwinyaataayo. Siyataati nyami naisohingwaasi sangisenda neti nandusaasataayo. Ami kingwaasi sangisawi maasi anditisaiپی otipipati kaiwi nawiho nepi ahoaiwi timanitaatiwo. Saiwi nini sangisenda napisanihi ami isihiyai saunditi Korindihiya aimi timetawaayopo undohirihiri kireti nawiho nanimitaatiwi nepi ikwiraatihi isiwatitaatiwe. ⁴Ami isihiya nahatiyaiisahi sahi Korindihiyaatapi saunditi kiya so nawiho nepi ahoaitaatiwi aimi timetawaayopo unditi kaundimbitihoninisi ami Masetoniyaahiya usaisangi ningisawi wiwa sangisenda napitaapo. Ami nyahi siyaati sangisenda napitihawahi sahi nawiho ahoaitaano tohiho sangi timetitauhito. Saiwi sahi sangi timetisaihi nasihaawi Masetoniyaahiyai nini sapi piwiha gaaha kaundohitihandapi mimaipaiwi gwinyaasahi ami ningisuni sangisuni apipaahi manyamaitaise. Iyati sahi sawanaatangi apipaahi aungwohandi masamaitaise. ⁵Aihi ami sandi kandapi nini sangisenda sangi napitiwatataati singwaasi nyami naisingingwaasi Kiraisihopi giwunyaapihingwaasi sangisenda jihi nandusaasataayo. Ami kingwaasi sangisawi otipipati maawi kaiwi nawiho sahi Autaahaatihomi isihiya Judiyaahanda mimaipaiwi bimohiyihiyaaپی nini nusesi nutandi ahoaitaatiwi jihi timaniwi katohiho keti nepi ahoaiwi isiwatitaatiwo. Aiwi jihi sangisaapihi napiti noaipasanihi nanimitaatiwo. Ami sahi saisaihi sami kiyohitindi siyati noaipaitande. Utaaho wo sangi neti tariwisatati sahi wapa kaitaatiwi jihi piwiha timaniwi watipitiwi katohipipa keti kaiwise maasatahandi kandi nehi sahi iparimatiwi sangisunyaapi kapa katohipipa nunyawahi kaitaatiwi kasatataato.

⁶Piwiha kima nini taati katohima sahi sami atihiri mwitipisawi atiwise: Utaaho wo nandapa isapipa yahonyaahi tiwihaati yamasiho ami nandapa akipipa nehi yahonyaahi kipwitaise. Iyataati ami utaaho wo nandapa isapipa pihitahi taahipipa tiwihaati yamasiho ami nandapa akipipa pihitahi taahipipa kipwitaise. Isi ami sahi siri kireti utaaho nandapa isapipa taahipipa tiwihaati yamasihomataiwi Kiraisihomi isihiya usaisi wapa nunyawahi kawitaatiwaahi nanihaiwi iparimatiwi taahipipa nunyawise. ⁷Iyawaawi ami sahi ninaasonjihi ami ninaasaanjihi isihiyai iwitatamanitandi wapa numwitaatiwihapaapi jihi kapa kaiwi sami maarihoatihi gwinyaapi wapa napauni ami napitiyaahapa numwito tiwi nepi timanjiniiwise. Ninaasonjihi ami ninaasaanjihi saiwi jihi gwinyaaposawi ipoti kapa nunyawise. Iyawaawi utaaho wo neti nanyipinjati tariwinyatati nanyipepaipiha kanyatiso tiwi nitaniwi wapa nawiho windi namunyawise. Owetise. Nehi ninaasonjihi ami ninaasaanjihi nanihaiwi maariwi nunyawise. Ami Autaahaatiho isihiya nehi nanihaiwi iparimatiwi ami maariwi wapa isihiyaisi nunyohiyihiyai maariho nunyahotihito. Apaapimaato. ⁸Iyataati ami sandi nini apaapimaato. Ami sahi wapa daahi maapatiwi nehi nanihaiwi

iparimatiwi nawiho ami wapaisangi isihiya usaisi numwisaihaahi ami Autaahaatiho wapa neti nga tisaahiwa nasamitaihito. Nasanyonihi sahi nahateweti nahataapa wapa wapaapisimbipa nga nepi ahisotati ami kapai nusatipihati wapa nehi isipipaimaawi ahisisotitando. Isipipa ahisisotanihi isihiya usa wapaapi nausetitonihiyai anditiwipi iwitatamaniatiwi gaahapa taahipipa sahi kaitaatiwo. ⁹Utaaho itapaati ninaasohi ninaasaamihi iparimatiwi wapa usai numwisiho numwisaamaatapi Autaahaatihomi piwiha satati jipatipindise:

“Utaaho so isihiya ikipipa owehatimai pihitati taahipipa numwiso ami wo isapipa kwitaaho osaataati mihopi mihini tiwihaasipatamatiyati wapa nunyati iparimatataise. Iyati ko sandi gaahandi kiyataise. Isi Autaahaatihouni ami isihiyauni ko gaahandi kaಿಂದံသိ jinjapihi jinjapihi kiyaanihi gwinyaitaapo,”

Aunihihiri 112:9

tati jipatipindise. ¹⁰Iyataati Autaahaatiho nasisoaari utaaho otipipati kaisihoai isapipa ko niyaamaitandihapa nunyati ami isihiya nandapaapi jaumwasawihiyai nunyahore. Isi ami kimikiyati ko sangi kahapaamapipa tisaahiwati nasamitaise. Nasanyonihi sahi Autaahaatihomi isihiya usaisi kiyaatinihi gaahandi pihitiwi kawimi nutaatiwo. Sahi saisaihi sami gaahandi kiyohitihandi utaaho isapipa yamasihhi ami komi osaataati nandapa akipipa pihitati noaipasipatamataiwi kiyaatinihi pihitiwi kaimi nutaatiwo. ¹¹Saisaihi Autaahaatiho sangisi daihira taahirihira wirawiraapi kahapaamapipa pihitati tiwati nyepiyati nasanyonihi ami sahi nga nasisoaari iparimatiwi isihiya usaisi nawiho ami wapa kahapaamapipa numwitaatiwo. Iyataati sahi nehi nanihaiwi nga iparimatiwi Autaahaatihomi isihiya mimaipaiwi Judiyaahanda bimohiyihyaapi nyahi nesi Jerusaremihanda nutihaawi nawiho nyangi nanyinyohihopi atisohiyihyauni ami nawiho ko nehohiyihyauni Autaahaatihoai kinyi gaahonjisi gaare hitihaato unditaapo. ¹²Iyataati sireti sahi Autaahaatihomi isihiyai nepi iwitatamaniwi kiya wapa nausetitimbipa naitaatiwiho nawiho nunyohiyihya kimikiyaami usa taahiyihya sahi kiyaisi gaahandi kawisohitihandapi apipaahi aungwohandi Autaahaatihoai kinyi gaahone gaare undawaatopo. ¹³Iyataati sahi sawanaati sandi kiyohitimandaahi nepi saiwi sahi akitinihi Autaahaatihoai maariho nunyawwi ami ko gwinyaati maaritimbipa kiyawaawi isihiyai nepi nunjitaatiwo. Nunjawwi ami sahi nehi piwiha taanauhihaahi satiwi nyahi Kiraisihopiha piwiha waniha gaaha gwinyaahaayo maatiwi ami sahi akitinihi Autaahaatiho maaritimbipa titihi kiyahaayo tiwi nepi nanyisawi isihiyai nunjisaihi ami kandapi isihiya Autaahaatihoai mepi autaahepumaitaapo. Aiwi sahi gaahati kaiwi iparimatiwi Autaahaatihomi isihiyaisuni ami isihiya usaisuni wapa pihitiwi nunyohipapaapi kiya Autaahaatihoai nepi mepi

autaahepumaitaapo. ¹⁴Ami Autaahaatiho sangi neti jatatamanati gaahandi kasihi ami sahi isihiya Autaahaatihomihiyaisuni ami nehi usaisuni maariho nunyawawi ami gaahati kawisohitindapi kiya maaritiwi sangi maariho nasinyawi ami Autaahaatiho sangi gaahandi kasitandi sapi gaapisunditaapo. ¹⁵Iyataati Autaahaatiho nyangi apipaahi aungwohandi gaahandi isihiyaani piwiha katitiha owehandi ko nyangi maariho nanyinyati apipaahi gaahati kanyisati komi Mwaaho nanyinyataise nyahi koai kinyi gaahonje gaare unditahaawo.

**Isihiya Usa Poriho Piwiha Nawihiyati Windi Amusaahoe
Tauhi Kandapi Wihoaaniha Kaundataase**

10 ¹Sahi sami usa nisapi Poriho so piwiha watipiha nawihiyati windi amusaahoe tauhihandi kandi Jisaasiho ipatisanati napaisaati wihoaanihati gaahati isihiyai kawipatamataindi ami nini Porihoninisangi kati kaindi ipatisandi napaisaati wihoaaniha kasatitandiyo sahi atitaatiwo. Sahi sami usa nisapi satawaatopo: “Poriho kimbihini nyangisati maasi bindataahura utaaho nehi koai anditimitati napaisaatinayahore. O ami ko nyangi nanyamasi niyati wapihi kaanihi bindataati ami utaaho nawihiyati anditititi watipiho bindataati piwiha kanyatataase,” tawaatopo. ²Sahi nisapi satohiyihiyaatangi nini sandi kasatitandiyo: Nini napiti sangisati maasi bindataati anditindi watipihoninindi sangisi piwiha windi kamaasatito. O ami isihiya nisapi ko isihiya Autaahaatihopi giwunyaahohiyihiyaaami kiyohipati kiyahore tiwi katohiyihiyaisaahi anditindi yamaindi watipihonini piwiha wihoaaniha kaundito. ³Nini nehi utaahonini samataindihonini kimaapi yapipataapihi bindataayo. Saindi nehi utaahoninindaahandi kandi isihiya nisapi Poriho siyahoe siyahoe tiwi katohiyihiyaatangisi sami kiyohiwaiwa neti isiwatataati sahi saiwihiyaate saiwihiyaate maasato. ⁴Pwisipi yaipati nini isiwasohipimba Autaahaatihomi watipihandisahapa isiwatataayo. Kimaapi yapimbatambihapa isiwatataamaayo. Autaahaatihomi piwihaisi ipihatindima nimbiputi piwiha nehaha asa katiwunjohiyihiyai titi ipihatitindo. Owetise. Nini pwisipi yaipati Autaahaatihomi watipihandisahapa isiwatataayo kapaaraahi piwiha nehaha yapipatambihaha watipitiwi ausaahohihai ipihatindima wihoaani Autaahaatihomi watipihandisiharaahi yahwiti titi ipihatitindo. ⁵Piwiha gaaha waniha atiwi nepi Autaahaatihopi giwunyaatitandihandi piwiha nehahaara nepi niwisapupwi kiyohiwaiwa iphatisa napuwaatosati piwiha akaaha kaundisaihi isihiya atiwi nepi Kiraisiho maarititi gwinyaasirihireti mmoniwi nepi japepihiritaatiwo. ⁶Ami sahi sawanaati Kiraisihomi piwiha kasatohiha atiwi nepi ami nisapi ko piwiha ausaitandi Autaahaatiho natausaasihoe tiwi gwinyaasaihaahi isihiya siya piwiha nehaha jaiwitaha ausaapi kasatohiyihiyai ambipati yaawihandi nunyati nemaito.

⁷Sami ndiheti sapihi noaipasitimandapi sahi baiwi mwitipiwi mmoniwi gwinyaapise. Isihiya siya ami satiwi nyahi titihi akitinihi Kiraisihomihiyaanisi Kiraisihomi piwiha nesi ausaawaati kasatihaato satiwi kasatawaawaahi ami nisapisangi ko nyamatiyati Kiraisihomi otipipati naasikati kiyahore tiwi gwinyaitaapo. ⁸Nini niwahonini naimaatiti tihaapaindi sandi Kiraisiho komi otipipati kawitandi watipihandi naninyataise titandi sandi gaahandimaahe. Gaametihihandi kandi ami apaapimaato, watipindi nyangi nanyamindindi sangisi newa nasisapusaihi sahi Kiraisihoai namaawipinjitaatiwi nanyamihihandimetihito. Ami watipindi kandaahi samihatihiti otipipati kaisaihi kiretapi sahi Kiraisihopi giwunyaahohitihandi watipitonihi noaipapi kopaahaitaatiwo. Isi ami Kiraisiho komi watipihandi komi otipipati kaitandi naninyahonine ndi tihaapaindi naimaatotihandapi windi mamaanyitande. ⁹Nini piwiha kimandi sapi jipatipiyotihara sami omanjititihiti yasitandi pondise. ¹⁰Sangisi yasihandi jipatipaitandi ningi ponje totimandi apaapimaato, ami isihiya usa nisapi satauhito: Poriho so kaanihi bindataati piwiha utipihoaatihiti katati jipatipaisiha omanjititihiti yainyawati naananyisiha jipatipiyati nusoasataise. O kimbihiti maasi nyangisati bimisura siyaha nawihitahi maarihoaisangisi nyandohaiwa windi kamaatahore nehi napaisaatihaiwa ausaahoe totihandapo. ¹¹Isihiya nyapi satiwi katohiyihiti nyapi gwinyaitaatiwi sandi katitandiyo: Nyahi kaanihi bindihaawi piwiha waati yasawaaha ami maariho naananyisiha utipihoaatihapi kasatotihamatiyaha nasaati maasi sangisaati bindihaawisangisi ami kimikiyaha piwiha kasatito.

¹²Isihiya siya sawana naimaatiwi piwiha kasatotihiyihitiyaapi kiya piwiha ausaahohitihandi ami gwinyaahotihandi nyamataiwi naasikamwaanji gwinyaapi naasikamwaanji piwiha ausaapihiye taati windi kiyaapi kamaatito. Owetise. Isihiya sawana kiyaami kiyohiwaiwaapi nyahi siyaati kiyono tiwi naimaatiniiwi mmotiniwesi ami usaami kiyohiwaiwaapi saiwi kiyawaayopo tiwi mmoniwi katohiyihitiya siya titihi amitiha gaaha gwinyaapihiyaamaahe. ¹³Nini niwahonini naimaatiti Autaahaatiho samwaanji saimbi kaime dimumwaanji kaindimapi ami kamaatimbipihimaawi otipipati kaimi nutandi owe. O ami Autaahaatiho sapihi samwaanji nisi piwiha anusaape tati kandati natanoasimumwaanji nini niwahonini naimaatiti piwiha awusoataataahi ami sandihiti nge. Iyataati ami nyahi daayaati piwiha ausaitihaahatihi sahi Korindihiyaati bindawaayopo. ¹⁴Nyahi ambipati naimaataati Autaahaatiho samwaanji kaiwise nyatimbipihuni ami kamaanyatimbipihuni osamaati kaimi namuto. Isihiya siya sangi napiwi piwiha kasatauhi nyahi jihiti nasaati sangisi jasonaati Kiraisihomi piwiha gaaha waniha ausaawaati kasatihaato. ¹⁵Nyahi otipipati kaitihaawi Autaahaatiho yatihiri ahaihi ahotimumwaanji namasisi usaami otipipati aimi kiyohipipihiti

nohaawi ambipati naimaatihaamaayo. Nyahi bipisi Autaahaatihomi piwiha ausaawaati kasatihaato sami giwunyaahohitihandi noaipati watipititando. Iyonihimi ami nyahi otipipati kiyohipati noaipati samihatihimi watipititandoi. ¹⁶Siyati samihatihimi noaipati watipitonihimi ami nyahi kaanihi yapipati wiwaara piwiha ausaitihaawi nutaano. Ami sandi apaapimaato. Isihiya usaisi Autaahaatihomi yatihiri nunyati samwaaŋi piwiha ausaapi kaiwise undati kaundati numwimbipihimi nini nundi ambipati naimaatitimi otipipati windi kamaito.

¹⁷Iyataati ami Autaahaatihomi piwihaatihimi satati jipatipindise:

“Ami utaaho wo wapaapi maaritati tihaapaitandaahi ami Autaahaatihomi koai wapa kawimbipaapi ningisi sanisahore tati Awaisihopi maaritati tihaapiyane.” *Jeremiyaaho 9:24*

¹⁸Utaaho wo sawaho naimaatitimi komi gwinyaasitihanda piwiha katisihopi so piwiha ausaitandimi Autaahaatihomi natausaasihomi akitihomaahe. Owe tiwi gwinyaapi usondaapo. Iyataati ami utaaho wopi Awaisihomi maaritati nuwimaati komi otipipatapi natausaasihomi so akitihomi piwiha ausaitandimi natausaasihore tiwi gwinyaapi usondaapo. Utaaho woaisi Awaisihomi nuwimaasihomi sohihi ambipati awaipati naitaise.

Porihomi Sawahomihiretapuni Jaipipa

Katiwunjohiyihiyamiretapuni Korindihiyai Piwaundataase

11 ¹Nini wani saindimi utaaho wo komi katatimi kaimbipaapi windi monatimi ami gimaawunyaataho piwiha katatimi wapa kaisihomataindimi niwahoninimi piwaatitandiyomi. Saindimi piwaatitandiyonimi ami sahi nehi nanihaiwimi ningisi ninjasawise. ²Nini sapi pihindimi waatimi gisunyaataayo Autaahaatihomi sapi waatimi pihititimi gisunyaasipatamataindimi ami sahi noaipapimi nehi Kiraisihomihiyaatimatimi ami nehi kopaahaitaatiwo. Ami nini saindimi utaaho wo ami woai piwiha jihimi timanatimi saundatimi kinyimi nisi maasihaamaati nepimi wiraitaapo undatosatimi ami komi maataatimi biyatimi winjatimimi notimi utaaho wo nehohoaisatimi namohaatimi ba kaundisihomai wiramasipatamataindimi sangimi netimi Kiraisihomai wisiramaitandimi nini sangimi nasamaatimi Kiraisihomipi giwunyaitaatiwimi piwiha kandisasitimi jainjatataayo. Ami Kiraisihomai wisairamasaninimi ndimaahomwaaŋi mmotinawaahura sahi noaipapimi nehi sawahomihiyaatititaatiwo. ³Ami nini sapi waatimi pihindimi gwinyaataayo nisi tiworisa sangimi katiwisasohiwaiwaara wiwa nepimi sami maarihomi amitihomi nasopisasisaihi ami aukwiraninimi Ewaahaatimi jaipundihimi Autaahaatihomipi piwiha winihapipimi nemasipatamataiwimi sahi Kiraisihomi nehi sawaho naasoaisaahimimi miwatitauho. ⁴Iyataati ami sandi nini apaapimaato. Isihiya usa sapihimi sangisaapihimi napihimi piwiha nehi kai wa nini Kiraisihomipi kasatohihaamatimetihomi kasatauhitomi. Aiwi ami sahi isihiya siya piwiha ausaapi kasatohirihiretapimi sahi itipihomi nehi wo wipetahomi Autaahaatihomipi Itipihomi Gaahomi sahi Kiraisihomipi giwunyaahohura nehohihomatimetahomi

newaayopo. Iyataati so Autaahaatihomi Itipiho Gaaso Kiraisihomi piwiha gaaha waniha nini ausaati sangi kasatonih ketapi sahi newaayopo. Siya isiya sandi siyauhi sahi maaritiwi kiyai numwaapi ami kiyaami piwiha atiwisawaayopo.

⁵Sahi kiyai taawi sawisawaayowi nini piwiha naharimatiha piwaatohima sahi atiwi nepise ami sapihi isiya sawanaapi satiwi nyahihi ami nyangi nehi autaahi wamwaanji Autaahaatiho nanyamihanati komi piwiha nanyinyati natanyoasihihyaane tohiyihya ningi windi akitinihi kiya namaanitihihahopo. Owe. ⁶Nini isihya kiyaami maariho windohonih maaritiwi atitaatiwihamwaanji piwiha windi nga kamandihoninindaahandi kandi Autaahaatihomi piwiha gaaha waniha Kiraisihopiha nini nga mmoniti neti nisi maarihoatihi ami amitiheti ahinotahonine. Sahi windi naharimitaatiwi nini nesipati japwaati sangisi kasatiti nasiso nahataapa nini aimi kiyohipiparo.

⁷Autahaatihomi piwiha Kiraisihopiha nini sangi sami nawiho nameti nehihandi ausaati kasatataayo. Aindi usai naanjihandi nunyataayo sangi jatatanitand. Sandi ami nini otipipati nehihati nisi nandapa ami yutihiri apotihirapihati kiyataayo. Sandi sangi neti Autahaatihomihaiwaapi autaahisiwitande. Isi ami nini saindi sami nawiho namaasehohitihandapi nisi tiworisa nisapi sangi jaipipa katiwisasohiyihyauni ami sahuni nisapi ko titihimetihati maipihati kiyataise tawaatowo? ⁸Owe. Nini Autahaatihomi piwiha Kiraisihopiha sangi kasatiti ami kandisasiti jatatanitandi Autahaatihomi isihya usa ningi nawiho naninyauhi ami nini ko netaayo. Autahaatihomi isihya ningisi saiwi nawiho naninyauhi ami nini nehi nanihaindi netaayo. Siyataati kiyaami nawiho ikowinataahandamataindi sangi jatatanitandi netaayo. ⁹Ami nini sangisati sapihi bimohura wapa nini nusetitimbipa naitandi owetih ami sahi nawiho wo nanimitaatiwi sangisi nini windi namaasiseho. Nini saindi sami wongi naanjihandi namaasanyo. Ami Autahaatihomi isihya yapipati piropinjihandi Masetoniyaahandaahapihiya Kiraisihopi giwunyaahohiyihya nisi naisihya usaisi nawiho nanunyahui kiya nesipiwi naninyauho. Sanisauhi ami nini sangisi naanjasihandi windi nasanyati ami nawihopi naninyawise satiti windi namaasaseho. Isi ami ipoti ipotisangi nini sangisi nawihopi windi apipaahi namaasasendo. ¹⁰Iyataati kima piwima kimbih watipindi katohima Kiraisiho nehi akaahaahih katipatamataindi kandaato. Sahi yapipati piropinjihandi Akaiyaahanda nahataapipih bimohiyihyaatami wo ningi nga neti namaanisapuwitaise nini sami nawiho namaitondi naimatiti katisaniho. ¹¹Autahaatiho mmosih nini akitinihi sangisi maariho nasanyataayo. Isi ami nini sami nawiho namehohitimandi sangi nini maariho namaasanyataatimahe. Owe. Sahi sireti windi gimunyaapise.

¹²Iyataati nini konihi kimikireti kaindi sami nawiho windi nameti owesatimi nuto. Sandi nini katohitimandi apaapimaato, ami sapihi samihatihisi isihiya bimohiyihiya satiwi Autaahaatiho komi piwiha ausaawa ami komi otipipati kawitahaawi nanyamihainjihiyaanisi Porihohi kaimumwaanji kamwaanji nauratiyaati kaito tiwi kiya sawana windi nepi namimaatitaatiwi nini kiyai neti niwisapuwitando. ¹³Iyataati ami siya akitinihi kiyaisi Autaahaatiho komi piwiha awusaapi otipipati kawitaatiwi namihanati natausaasihihyaamaahe. Owetise. Kiya nyangi Autaahaatiho nanyamihainjihiyaane tohitindi nehi sawana gwinyaapi sawana nepi naimaatiwi jaipitiwi katawaatopo. Jaipitiwi ami kiyai Kiraisiho neti namihanati windi natamausoasihihandi kandi Kiraisiho kiyai natausaasihihiyeye tiwi isihiya kiyaapi giwunyaitaatiwi Autaahaatihomi otipipati ami komi otipipatihiya akiyihyaamataiwi kiyawaayopo. Ami kiya saiwi sandi kiyohitimandapi nini windi doti yaindimataamaayo. Owetise. ¹⁴Ami wiweti Bwaasirihirisangi yamihapataatihi Autaahaatihomi otipipati kawiji komi ndimaahomwaanji bitohohiyihiya enjerihiya nausaatahiyaamatiyati noaipahore. ¹⁵Isi ami sahuni ami ninuni windi yayawaamaamaitihaawo Bwaasirihirami otipipatihiya wiweti isihiyai saundiwi Autaahaatihomi ndiheti nyahi titihi gaahiyaani bitotahaayo undiwi kiya titihi Autaahaatihomi otipipatihiya akiyihyaamataiwi noaipaitaapo. Ami saiwi kiya taawi saiwa kiyohipimbaapi maipihandi wihoanjihandi titihi kireti kiyaisi Autaahaatiho nunyonihisi naitaapo.

**Isihiya Sangi Nepi Nasopisasauhiihiyai Sahi Nanihaiwi
Numwaawaayowi Nini Naharihonisamataindi
Kasatitandiyohima Sahi Atiwi Nepise**

¹⁶Nini bapaindi jihaati kandaato nini piwima kasatitandiyohimaapi kasatisanihi ami sahi nisapi ko utaaho nahariho wapa gimunyaahoe tiwi gimunyaapise. Iyawaawi ami sami usaati nini katohipipaapi naharihiyaamatitihapa kandaase tawaawaahi ami sahi isihiya satiwi Autaahaatiho nyangi natanyoasihihiyaane tiwi jaipisatohiyihiyai numwaahohipatamataiwi nini kasatitandiyohima atiwi nepise. Ami sahi saisaihi isihiya jaipipaisahiya kiyohirihireti kaindi nehi masihonji nini niwahonini neti naimaatitaano. ¹⁷Iyataati nini taati katitandiyohiwimaiwaapi isihiya usa saiwi wo naharisati gimunyaahomi piwihaamataiwi atitaapo nini niwahonini neti naimaatiti katisaniho. Ami nini Awaisiho Jisaasiho katitihireti windi piwiha kamaatito. Nehi utaaho wapa gimunyaati naharihohihireti piwaatito. ¹⁸Iyataati ami isihiya taahiyihiya samihatihisi kiya otipipati kiyohipipaapi naimaatawaayowi isihiya Kiraisihopi windi gimaawunyaapihiya naimaatohirihireti ningisangi nini samihatihisi otipipati kiyohipipaapi naimaatito. ¹⁹Ami

sahi isihiya sapihi sangi jaipisatiwi nyahi Autaahaatihomi piwiha atisaati newa ausaahohiyihiyaane satiwi kiya piwiha katiwisasohipipa maaritiwi atiwiwi kiyai numwaawaayopo. Sandi sahi maaritiwi kiyai numwaahohitindapi nini sangisi sasatataato. Sahihi sami amitiha gwinyaapi mmoniwi nehohitihandi apipaahi aungwohandisawihyaate. Isi ami sahi “Ye, akite,” tiwise. ²⁰ Iyataati ami sahihi isihiya sangisi nepi gwaasihaamataiwi yatih gwausoapauhahandi kandi sahi gaaso tiwi nehi winjawaayopo. Aiwi sami nawiho nandapa nepi owesamapi ami samihetapi kiya sawana nepi itatamanindaatiwi jaipisatiwi nasepi ami awaisawihyaamataiwi sangi nepi wirapi asipi nasipinjawi ami sami ndimaahomwaanji mimaipisiwi mwaahoapisauhohiyihiyaisi sahi nehi nanihaiwi winjawaayopo. ²¹ Ami nini isimiya siya sangisi saiwi kasisohirimireti windi kamaasionihi kandapi sahi nisapi saiwi ko nyapi yayati itiwati ami watipihomendaati kiyataisi koai mawane tawaatowo? Ye, akite! Nini apipaahi kaasarihonini napaisihoninisi gaasi manyane.

Iyataati ami isihiya usa kiya katiwi kiyohipipaapuni ami kiyaametirihiretapuni watipitiwi naimaatiwi tihaapaisaihaahi ami nisangi nini kandi kiyohipipaapuni ami nisetirihiretapuni tihaapaindi naimaatito. ²² Ami kiya satiwi nyahi nyami isihiyetapuni ami nyami piwhetapuni Ipiruhiyaane tiwi tihaapaisaihaahi ami nisangi Ipiruhonine. Aiwi kiya nyahi nyami yapipati Isiraherihandaahapi Isiraherihyaanine tiwi tihaapaiwi naimaatawaawaahi ami nisangi Isiraherihonine. Iyataati kiya satiwi nyahi Abiraahamihotepi namoyaatimi nasaahiyaanisi Abiraahamihomi saisatoyaane tiwi tihaapaiwi naimaatawaawaahi ami nisangi Abiraahamihotepi namoyaatimi nasohiyihiyaami noaipatihonine. ²³ Ami kiya satiwi, “Nyahi Kiraisihomi otipipatihyaanisi kopi otipipati kawisihaayo,” tiwi naimaatiwi tihaapiyawaayopo. Ami ninihi kiyai nusatipihiaati Kiraisihopi otipipati waati nga nawihaindi kaindhonine. Saiwa nini taati katohiwimaiwa utaaho naharisahomataindi kandaato. Nini kiyai nusatipihiaati otipipati waati pihindi kiyataayo. Aindi nini Kiraisihopi giwunyaati komi otipipati kawisonihi ami kandapi ningisi isihiya nepi deti deti nanipuwawaayopo. Isihiya jaipitiwi nyangi Autaahaatiho natanyoaasihiyahaane tohiyihiyai windi samaawisopo. Owe. Ami nini Kiraisihopi giwunyaahonihini kandapi isihiya irihiri pwisipati watipihapaara waati apipaahi yaasati sisiha tindihaiwa nindipapi niwawaayopo. Ami isihiya isihiyaisi jaipundiwi Autaahaatiho natanyoaasihiyahaane undohiyihiyai windi samaawisopo. Owetise. Iyataati nini Kiraisihomi otipipati kawisohitihandapi taahiwaiwaara sohonini maanini napotaayo. ²⁴ Iyataati ningi Judaahiyaami awaisawihya wirihiri pwisipati watipihiraahi 39 kaiwihaiwaara niwawaayopo. Iyawaawi sandi nehi naasuraahihini niwawaamaayopo. Owe. Kihura kihurema ami wura wura 5 kaiwihaiwaara niwawaayopo. ²⁵ Mairi

maara pwisipati turaipata nipi ami wura isihiya wirisandihandi sohonihni niwitotiwini nawiha wirapi nepi nisiheti yanotiwini yanipi ami wura mairi maara kopuhoti durihiraatihni niyonihni kopuho nawatatati nopisasinati maipindaise. Maipitihni nini maanihni napoti oweto. Iyataati saindi wura apatihni naasainditihni ami asisiha ipiho naasotihni wapeti isiti wirandonihni sananotaise. ²⁶Nini wapihi wapihi nundi napiti daindi koninihni Kiraisihomi otipipati kawisataayo. Siyataati waapihaati taahaamaati nahaitonihni maanihni nanesihni maanihni napoti ami wiweti ikohiya (wapa gaahapa nawiho kiyahapa isiwahoe tiwi) maanihni sohonihni nipi ami wiweti nini niwahonisi isihiya Judaahiya sohonihni maanihni nepinimahopo. Aindi wiweti isihiya nyahi Judaahiyaami dawaapipihapihiya sohonihni maanihni owenimapi ami wiweti isihiya taahiyihyaami aunahipa awaiwaiwa mwipihaiwaami otihatihni sohonini maanihni neti nihirindi ami isihiya aunahipa owehapihi sohonini maanihni napoti ami wiweti durihiraatihni kopuhoti daimi notaati sohonini maanihni witonihni durihiri maanihni neti naninje. Iyataati ami wiweti isihiya kinyatiyaati Kiraisihopi giwunyaawaahiyaanisi kinyi naisihyaane diwihya kiya ami kopi akiti windi gimaawunyaapihyaami otihatihni maanihni neti nopisasindi sohonini napo. ²⁷Ami nini wura nisi ambipatapihapaapi otipipati apatinditihni kiyatoandaati nini windi baindi namoho. Aindi wiweti nandapa ami waapoho owendaati janimanati nainyati ami wiweti nandapa ahotihihandi kandi otipipati nanesihni kati kaindi kiyataati nandapa windi namaaniho. Aindi ami wiweti nini niyoti nipaaitandihapa wapa apotihiri taahipapa isipipa owendaati binimanataise. ²⁸Iyataati ami saiwaami tiwatihahaati asisiha nahateweti isihiya nini Autaahaatihomi piwiha kaunditi kandunjonihni noaipapi Kiraisihopi giwunyaahohiyihya wapihi wapihi bimohiyihyaapi kiya nga bindawaayondiho ndi pihindi waati gwinyaatoandaayo. Iyataati kandaahi nisi maarihoaatihapi naanjanisataise. ²⁹Siyati naanjanisati ami nisi naisoho wo nisatiyati Kiraisihopi giwunyaaho komi anditati Kiraisihopi anditititi giwunyaasipati turimihaisendauhi atindi mmonataahura ami nisi anditatisangi nimahiyati nanipandiwihni ami nisi Kiraisihopi anditindi giwunyaitandihandi owehonisamataindi noaipataayo, ami ko naisosopi nini maariho asipiyohitihandaaho. Aindi ami naisoho wo nisatiyati Kiraisihopi giwunyaasihoi isihiya usa maipihandi kaitandihatihemihauhi ko maipihandi kaise tauhi nini atindi netaahura nisi maariho yaasati ami nisi mandihaatihni sisiha nihoandataise. Sandi ami nisi naisoho maipihandaatihni naindihandapunini ami utaaho koai numwaasi maipihandaatihni naisihopi ningisi apipaahi aponyindahandahe.

³⁰Ami nini tihaapaitaahetisi ami ningisi wapa nanoaipasihni kandapi isihiya mmopinimahohitihandapi nini tihaapitito. ³¹Iyataati Autaahaatihni nyami Awaisihni Jisaasihomi Sapiho ami nyahi Koaisi newa

mepi autaaahewaumwaitihaaho mmosihi saiwa ningisi nanoaipasiwiwa sangisi nini akitiha akiti nanoaipase ndi kasatataato. ³²Wura nini aunahipa mwipihati (katami ambipati) Damasikaasihanda nundi bimonihhi kapihi jihi awaisiho Aretaasiho namihainjihhi Aretaasihomi yatihhi otitihhi isihhiya Damaasikaasihandaahiyai winjatisiho ningisi neti winiraito tati komi tingaatihaisahiyai nini aunahipati namasi noaipasanihi niwitaatiwi matambipaami onepataini ahiwihhi jatawaayopo. ³³Saiwi jatauhi ami nisi naisihhiya baasiketihandi awaindihandi nepi kandopi ningisi winipi wirihiri nepi kireti baasiketihandi wiramapi aunahipatami matambipeti tisautihiri daundirihira bipi kihura kihura nanoasauhi noatipati timahiyai yanihimataayo. Yanihimahonihhi awaisiho Aretaasihomi otipipatiho kiyapiho ningisi windi maanise.

**Autaaahaatiho Porihoi Auta Yapepatamatiyahaiwetapi
Piwiha Pihitahaiwa Kaundataase**

12 ¹Isihhiya piwiha jaiwitiwiha ausaahohiyihhiyaamataindi niwahonini naimaatindaano ndi naimaatinataataahi sandi nisi naimaatinohitindaahi windi nahatiyaanangisi anditinyiwati manyitatanaitaise. Iyataahandi kandi Awaisiho piwiha wiwa yapepatamatiyahaiwetapi auta nanisati kandiwaiwaapi katitaano. ²Nini aimi gwinyaataayo utaaho wo Kiraisihopi biyati giwunyaahoi Kiraisiho numwaasi mihaati yamihapataatihi Autaaahaatiho bimimbipihhi naindihandapo. Siyati mihaati numwaasi nasaamasihhi kinaungwiha aimi ikwimaindimwitihhi auhiraami yahuri 12 kiyati sanaise. So utaaso komi maariho yamihapataatihi naindihho e komi ambipati katisati naindihho ami nini windi moniti gimaanunyanjo. O ami Autaaahaatiho sawahohi sandapi gwinyaahoso. ³Utaaso sopi nini aimi gwinyaaho komi maarihoeti ami komi ambipati katisateti saphi bimihhi nini sandapi komi ambipati katisate komi maarihohihe ndi windi baindi monihho nehhi Autaaahaatiho sawahohi gwinyaahoso. ⁴Isi koai Kiraisiho numwaasi mihaati yamihapataatihi Autaaahaatihomi ndiheti isihhiya giwunyaapi bimambiwihhiya napopi naiwi gaahapihi gaahiya ainahiyihhiya bimohipihhiya niyataise. Mihaati kapihi piwiha wiwa noaipasihhi ko atisati netaise. Saiwa piwaiwa nehhi isihhiya atiwi nesisi ami isihhiya usaisi ausaapi kaunditaatiwihandapi Autaaahaatiho apipaahi owetahaiwaare. ⁵Utaaho siyahopaahi nini asakaindi kopi maarititi tihaapaito. O ami isihhiya nisapi so utaaso awaisiho gaahomaahhe nawihiyati piwiha yanyawiha kamaatati kunyapeho komi piwiha napaisaati piwaatahoe tiwi katisaihaahi sandapi nga katawaatowo ndi niwahonini maarititi tihaapaito. So utaaso yamihapataatihi naise toto wopimaato titihhi nini niwahonisapito. Nini yamihapataatihi naindi Autaaahaatiho auta nanisati saiwa kandihhi atindi netihonine ndi windi naimaatindi tihaapimaito. Owe.

⁶Yapepatamatiyahatetapi auta Autaahaatiho nanisahoniso ndi naimaatataatisangisi nini naharihiyaami piwaatohimumwaanji windi piwaamaatito. Nini piwiha titihi akitiha akaahaahihi ausaitandihandiso. Nini saiwa mmonihohiwiwaapi saindi mmonitihoniniso ndi windi namimaatisanihi ami sangisangisi ko siyahaiwa mmonati nehoe tiwi windi maarimitiwi mepi autaahopinimaamaitaatiwe. Nehi nini piwiha ausaati kasatiti ami nini kiyohiwaiwa mmoniwi ko siyati kaiso tiwi jaitaatiwe.

**Autaahaatiho Porihoai Kinyi Napaisoñitinihura
Nini Anditihiwataayo Undataase**

⁷Autahaatiho saiwa apipaahi gaahaiwa ningi ausaati ausaimanati nanisiwimaiwaapi Autahaatiho ningisi siyati nanisahonine ndi tihaapaindi namimaatindandi timbipa wapa jaatihramatiyati ambipatisi muwihapa nusoaipane tati Autahaatiho gwinyaasihi ami Bwaasirihiri kirami otipipatihoai natausaasihi nasati ningisi taati jaatihraahamatiyati nanemati miniwataise. ⁸Aihi nini Awaisiho Jisaasihoai kimandi miniwati nanemati yaasindimandi nepinimape unditi aimi mairi maara kaunditi nunjenataayo. ⁹Nepinimape unditi nunjenihonihandi kandi ko Awaisiho wihoanjiha satati kandataase.

“Sandi kinyi ambipataatihapi nahemati mihiwindihandi nini windi nemaahimaito. Owe. Saindi windi nehimaamataahandi kandi nini gaahati kahindi anditihiwito. Ami kinyi windi anditimitipi kunyapehonitisamihura nini gisi neti watipihimati nga anditihiwito.”

Winihapipa 19:15

Awaisiho ningisi satati kandihhi ami nini Awaisihoai timbipa nepinimape munditi gaasi kaundi napaisihonini kunyapehonini bimitaano ndi tihaapaindi maaritataayo. Saindi nini napaisihonitisanihi ami Kiraisihomi watipihandi neti waati nanimaasati watipinimahonihhi komi otipipati kawitando. Ami isihiya Kiraisihomi watipihandapi akite titaatiwo. ¹⁰Nini Kiraisihomi otipipati kawisataati nini noaipati utaahonini kunyapehonini napaisihoninindaayo. Aihi isihiya ningisi mimaipiniwi kahatamatipetihaiwa kanisawaayopo. Isihiya ningisi nehihaiwa saimbihone ndiwi kandiwi ami naanjanisahaiwa nanoaipasihi kaiwa ipihatindimati ami isihiya nipi ami Awaisihomi otipipati kaitandihira daihira nanimbipuhauhi naanjanisataise. Ami nini saindi napaisonini kunyapehonini bimonihhi Kiraisiho komi watipihandi naninyati watipinimataise.

**Poriho Korindihiyaami Kiraisihopi
Giwunyaahohitihandi Neti Anditihiwataise**

¹¹Nini isihiya naharihiyaamataindi piwiha kasatataato. Ami nini piwiha saindiha windi kamaatitihati kati sahi sawanaati katime ndiwi

nanepepaipapi katauhi kasato. Sahi nisapi ko siyahoe maatiwi isihya jaipitiwi kiyaami ambipati naimaatiwi kasatohiyimiya siya nga ningisi nanitipihapihyaatihi nini kiyaami otitih binotaamaayo. Ningisi Autaahaatiho watipihandi namaaninyonaahi nini nehohoninititaanihe isihya jaipitiwi nisapi katohimatamataindo. ¹²Jihi nini sangisati maasi bimohura sahi nisapi titihi Autaahaatihomi otipipatihoe tiwi mmoniwi gwinyaaitaatiwi wiwa kaimi niyonih noaipasih sahi mmoniwihyaate. Autaahaatihomi watipihandaahi siwipati watipihaiwa kaindi ami wiwa otipipati watipihaiwa kaindi nini akitinihi Autaahaatihomihonine ndi komi watipihandi nasisataayo. Saindi nasisonih ami sahi nisapi Autaahaatiho komi piwiha awusaitandi natausaasisih akoho akitihore tiwi waati gimunyaahopo. Owetise. ¹³Nini Autaahaatihomi isihya wapihi wapihi bimohiyihyai otipipati kiyohitihandapi nawiho naninyawise mundonihandi kandi naninyawihoninisi ami naasi kati kaindi ami sangisangisi nawiho nanimitaatiwe ndi isihya jaiwitiwi piwiha ausaapi kasatohiyihyaamataindi windi kamaasatito. Owe. Sandi saindi kiyohitimandi usinjaate. Ami wiwa nini sangisi nawihopisatisanihi naagasitaihihi nge. Sami nawiho namehohitihandapi sandi maipihandi kiyati nawiho otipipati kaitandihandapi nameso tiwi gwinyaawaawaahi nisi maipihandi sandi sahi nepinimapise.

¹⁴Nini aimi yataira napitati wani ami kasinihandi napitandiyoni napiti naagasisihandi nawiho naninyawise satiti nawiho windi namaasaito. Nini sami nawiho samihapa isiwahohipipa nanimitaatiwimahe. Owe. Nini sahi isihyaatangisi nasamaasanihi isihya nawihopisatiwi nasehohiyihyaamihiloaani namuwi nisihireti japi naitaatiwe. Iyataati manyinya saniya sapiyaapi nawiho numwitaatiwiho nepi turimanawaamaayopo. Owetise. Saniya sapiya mwaaya maatiyai numwitaatiwi nawiho wapa nepi ahowiwi turimanawaayopo. Sandi titihe. Isi sahi nisapi koaisi nawiho numwitihahoe tiwi nepi timaamaniwise. Owetise. Nini sangisi anditisaiwitandihati otipipati nehhati kaitaano. ¹⁵Isi manyinyaisi saniya sapiya kawisohipatamataindi nisapa isiwahohipipa nasamitaano. Aindi nini sangisi maariho waati pihindi taati nasanyami niyonihandi ami sahi ningisi maariho nehi masihonjihhi nanimitaawo?

¹⁶Isihya piwiha nehaha kasatiwi daayohiyihya nisapi piwiha jaiwitiwiha sangisi sasatawaatopo. Ye, Porihohi isihyaisi naanjihaiwa nunyatipane tati gwinyaataati nawiho sami namaasetaise. Siyati sami nawiho auta nametaahandi kandi noaatati isihyaatangisi jaipipa kasatati nawiho nasetaise satawaatopo. ¹⁷Isi satohihaapi wihoaaniha kasatitaano. Nini jaipisatiti nawiho naninyawise satiti nasaitandi utaahuri yahurisi nanaita numwise unditi windi nandimusoaaso. Owe. Ami sandapaahi sangisangisi aimi baiwi gwinyaapihyaate. ¹⁸Nini Taitaasihoai piwiha

baindi kaunditi tariwunditi sapi nandusoasataayo. Aindi ami naisoho woaisi maasi numwise unditi nandusoasataayo. Nandusaasonihi Taitaasiho sangisenda nasati nawiho naninyawise satati nahato nasetaiso e owetiso? Nanyetaise tiwisono! Taitaasihotihi ami ninitihi naasikireti naasikati kasisahaayono e ko wiretitihi ami nini wiretitihi kiyahaayono? Saihito tiwi katiwise.

¹⁹Sahi nisi utipimo kimo awitawaawi saiwi gwinyapenawaayopo utaaho so saiwa kamayonihandi nehilaiwa katopo tati jipatipaise tiwi gwinyapenawaatitaatiwi owe. Saiwi sahi gwinyaawaawaahi sandi asirete. Autaahaatiho atininjatihi ami Kiraisiho siya satiwi katowi satipi kaunde ndihi kasatataato. Isi nisi naisihiyaati maariho wisaiti maariho nasanyohiyihiyaate sandi kasatataato. Nahataapa nini kaindi ami nahataapa nini piwiha kasatohiwimaiwa nisapimahe sape. Sahi Kiraisihopi andititiwi giwunyaapi koai niwipinjitaatiwihandape.

²⁰Ami nini kimikireti saindi kasatohitimandi apaapimaasato. Ami nini sangisenda napiti jasosanihi ami nini sapi maarititi gwinyaahohipipa windi kamaiwi sangi wireti kaisaihi kandapi nini sapi windi maarimitite ndi gwinyaataati kasatataato. Ami sahi saisaihi nini maarimitataati kandapi nini sangi watipihapa wapa sami maariho ambipati yaasihapa kasisanihi ami sahi windi kandapi maarimititauhito. Iyataati wiwa maipihapa kahatamatipetihapa samihatihisiyahapa ahotitaihi nini waati gwinyaatatito. Sahi wonji waanji wo waatapi kinyi maariho mimaipaimbi gwinyaapi ami nuwi napiwaiwi wonji waanji wo waatisami waapihiniwi aposahapara itihinniwi ami Kiraisihomi isihiya ahoyaniwi baiwi bimohititihapi yandihematiwi wuraahi sihoasangisitimi ami wapuraahi sainjaasangisitimi ami waanji wo waatapi kiyaami ambipati dahopa nepi nusopisasawi piwiha wa nehi akaahaametaha kiyaapi isihiya usa atisauhi katiwi ami wonji waanji wo waatapi kiya windi atihomaasisauhi kiyaami dawaataatapi noasawi katiwi ami wonji waanji wo waatami gwinyaasitihandapi ipatisaniwi mmoniwi kiwahonji kiwihaanji nahataapa nga mmona gwinyaawaahiyaaniso tiwi nepi naimaatiwi apipaahi genanitauhito. Saiwi sahi kiyawaawi sahi Kiraisihomi isihiyaati Autaahaatihopi giwunyaapi aunihihiri katiwi komi ambipati awaindepumapi mepi autaahepumaitaatiwihandi niwipita naharimatonihisi ami sahi sawanaati naharitauhi nini gwinyaataatito.

²¹Saindi gwinyaataati nini sangisenda napiti ami sami ndimaahomwaanji jasondandihandapi pihindi gwinyaati awaindihandi yayataayo. Ami sandi apaapimahe. Isihiyaati sahi usaati jiji nini napiti jasohohihuraapi sami maipihaiwa isihiya nahatiyaami gwinyaapi japepinjohirihiretapi sahi ipatisaniwi mmoniwi windi gimaasunyaatatati nehi sangi sami maariho kasatihi sami ambipati jandoti maaritirihireti apipaahi sangi windi mamaasamahiyaati apipaahi ainjotahapa kaiwi sami ambipati

usihiyaati ami ashihiyaati kiho ami kihaatisawi naminiwi kiyohiwaiwa kaiwaanihi sahi waati taawi kaitaapo. Kaisaihi nini napiti noapati jasondo. Saindi nini sahi maipihaiwa windi namaamapi kiyaatinihi taawi kaisaihi sami ndimaahomwaaŋi jasosanihi ami sami maipihaiwa apipaahi ainjotahaiwa Autaahaatiho ningisi neti nanisitaise. Nanisonihi nini kaiwa mmonataati ningi apipaahi aungwohandi manyamati ami nisi maariho aungwohandi yaasamaitaise.

Porihō Korindihiyai Sahi Baiwi Jatiniwihiyaatitosawise Undataase

13 ¹Nini sangisi wani kimandi napiti jasondandiyohitimandi noti 3 handi mairi mandititaise. Sami bimohirihiretapi aimi jihandi 1 handi kasatiti ami kapihandi 2 handi kasatiti ami wani kimura mairimanda 3 handi kasatitandiyohitimandapi Autaahaatiho komi piwiha wa wapihi jipatipindisihaatihapi watipiha satise: “Utaaho wo maipihandi kiyonihi ami isihiya koai winjahohiyihiya yahurisangi ami murimoaisangi kiyaami ndihaara winjahohiyihiya, ‘ye, akite. Ko sandi kaihi ami nyahi winjahaayo,’ tisaihi ko maipihandi kaisihomiheti piwiha niyonihi isihiya akitihe tiwi mmondaapo. Aiwī utaaho maipihandi kaisihoai saundiwi, ‘kinyi maipihandapi ami maipihandi wihoanjihandi nepe,’ undiwi piwiha komiheti nepi yawutaitaapo.” Aihī nini sangisi jihī 1 handi sahi maipihandi kiyopo satimihoninisi ami wani kapihandi 2 handi sahi maipihandi kiyopo satataato. ²Nini jihī 1 handi ami kapihandi 2 handi napiti jasohohura sahi maipihandi kiyowi jatiniwo satataato. Aindi wani nini sami kaanihi bindataati kapihandi 2 handi sangisi baiwi jatiniwihiyaati bimaawise satataato. Isi ami nini sangisi Kiraisihomi isihiyaamihatihapi ipaahaapi dawaataatesamatosati jihaati mweitipisati windi kamaasatito. Nini napiti sangisi jihaati jasonataahura nini jihī napiti jasohohura isihiya maipihandi taawi kiyohiyihiyaisuni ami kuraapi namasawi maipihandi kiyohiyihiyaisuni ami kiya kiyaami maipihandaatihapi aimi windi namepemaitisaihaahi nini kiyai neti Kiraisihomi isihiyaami dawaataatemaito. ³Sahi watipitiwi ningisi sandawaatopo. Ami Kiraisiho kinyi maahomwaaŋi neti kinyihetapi piwiha katonaahi nyahi mmondaani nepi nanyise ndawaatopo. Isi ami nini sami maipihandapi piwiha watipiha kasatiti ami wihoanjihandi awaindi sangi kasindi nasamisanīhi ami sahi nisapi koai Kiraisiho komi otipipati nunyati natausaasihioe tiwi mmondaatiwe. Kiraisiho sangi wapa kasisataati watipihandi oweho napaisiho kiyataamaise. Owetise. Ami kōhi apipaahi watipihō samihatihī wapa kiyataise. ⁴Iyataati ami akitinihi Kiraisiho napwisuraahi komi watipihandi oweho anditimitahoai ipi titihī atawihateti isihiya tipī tipimandawaayopo. Iyataati ami wanisangi akite ko japihi asohoematati bimindimandi Autaahaatiho apipaahi watipihosi watipihaiwa kiyati Kiraisihoai

japihi ahowimasih ko asohoematataise. Ami sikireti nisangi apipaahi watipihandi owehoninindaati ami Kiraisihoaisati nini timaamaitataayo. Saindi watipihandi owehoninindaahandi kandi Autaahaatiho Kiraisihoai ahowimati watipihandi numwindihandi nanimihihoninisi nini kandaahi sangi neti waati watipindi titihesamaito.

⁵Kiraisiho komi Itipihoraahi sami omarjititih yaho bindataisi sahi sandapi baiwi mmonawaayowo e windi mohowo? Sahi baiwi nyahi Kiraisihopi akiti giwunyaahaayono e owetiso tiwi nepi sawanaati mmotiniwise. Ami wiwa sahi saiwi sawanaati nepi mwitipisawi mmotinawa sahi Kiraisihomi isihya akiyihyaatimetiwiwipano. Isi ami sandi kandapi sahi baiwi mmotiniwi noaipapi akitinihi isihyaati Kiraisihomihyaatimatiwise. ⁶Iyataati ami nini niwahonisapi saindi gwinyaataayo. Sahi sawanaati mmotiniwesi ami ningisi sahi nepi tipitapaapi nisondaatiwe ami nini sahi nepi nisonawaawi Kiraisihomi otipipatihonini akohonino e owetiso tiwi sahi mmondaatiwo. Mmoniwi sahi nisapi satiwi e Porihoai Kiraisiho komi otipipati kawitandi namihainjihoe tiwi gwinyaitaapo. ⁷Sahi nisi piwiha nini kasatohiha windi nemaamapi ami sahi windi maatimaatimiwi nisi piwiha atiwi kasatohipipa kaitaatiwi Autaahaatihoai piwaunditi sapi gaapisundataayo. Sandi nini sapi gaapundohitindi isihya nisi tiworisa nini sangisi kasisohipipa mmonawaawi ami kiya nisapi satiwi e Poriho so titihi Korindihiyaamihatih otipipati kaitandi Kiraisiho natausaasihihoe tiwi mmondaatiwimahe. Owetise. Ami sahi titihapa kaiwi nisi piwiha kasatohiha atiwi isihya maipihaiwa kiyohiyihyai titihpumapi ami isihya jaipipa katiwisasawi nyangi Kiraisiho natanyoasihihyaane satiwi jaipipa kasatohiyihyai sahi ahosumwaitaatiwe. Sahi saisaihi nini Kiraisiho nanimihainjih komi otipipatihonini akohonine satiti Kiraisihomi watipihandi nasisati waati watipindi windi sangi neti nini titihemaasamaitando. ⁸Ami sahi Kiraisihomi isihyaati komi isihya kiyohirihireti atiwi titihi kireti kaisaihaahi ami nini sangi neti windi titihemaasamaito. Ami sandi nini apaapimaato. Sahi titihi nini kasatohipipa kiyawaawaahi kimikandi Autaahaatihomi piwiha akaaha isihya atiwi nepi japepihiritaatiwi nini kiyai neti anditiwiti kandunjohihaisati noaipati timaamaitataise. ⁹Sahi Kiraisihopi watipitiwi giwunyaapi ami komi piwiha atiwiwi asimwaatitih piniyauhi nini maaritataayo. Ami ningisi manditinisohiyihya tiworisa satiwi ko watipihandi owehosi yayati itiwahoe tiwi gwinyaasaihahandi kandi sangi nini watipindi neti windi titihemaasamaitando. Iyataati nini sapi gaapunditi Autaahaatihoai nunjenohitimandi apaapimahe. Ami Autaahaatiho sangi neti anditisaihonihi sahi noaipapi maariho naasohitanihi timaamaitiwi watipititaatiwe. ¹⁰Ami sahi sandi saisaihi namati Awaisiho nini wapa kaitandi ningisi nanimindhanda sangi neti

waati mitaahi watipindi titihemaasamaitandi kandapi nini kaanihi bindataati kimaiwa utipihoaati sapi jipatipiyataayo. Iyataati ami Awaisiho ningisi komi watipimandi nanimindimandi nini neti sangi wapa kasindi nasisapusanihi sahi kopi windi gimaawunyaitaatiwi nanimihihandimaache. Owetise. Nini sangi neti anditisaisanihi sahi watipitiwi koai niwipinjitaatiwi nanimihihande.

Poriho Korindihiyai Piwiha Ipotiha Asitipuwati Gaahuraare Undataase

¹¹ Kima nisi piwima ipotihaare. Isi nisi naisihyaati nisataiwi Kiraisihopi giwunyaahohiyihyaate. Nini sangi sandi sahi maaritiwise. Aiwi bimaawise. Aiwi titihi gaahiyaati noaipapi ami nini anditisaiti kasatohirihireti kaiwi wonji waanji ami wo waati nepi anditiwipi andititiwi maariho naasohitanihi nini kimaiwa kasatohiwimaiwaapi gwinyaapi ami sahi wonji waanji dopi wo waatisami itihinniwi tunniwi mimuniwi nehi napaisaati bipi yatih ipatisaniwi maariho nehi naasohi gwinyaapi timaamaitiwi bimaawise satataato. Ami sahi saiwi nini kasatohipipa kiyawaawaahi sahi ninaasonji ninaasaanjihi ami wo waati maariho nunyawu namindaatiwuni maariho yatihitonih napaisaati timaamaitiwi bimitaatiwuni Autaahaatiho neti anditisaisiho sangi gaahandi kasitaise. ¹² Sahi Autaahaatihopi giwunyaapi ami koai mepi autaahepumaitaatiwi Kiraisihomi isihyaati ahoyanawaahura ninaasonji ninaasaanji Kiraisihomi isihya kiyohirihireti kaiwi sami maariho naminihohitihandi nepi ausaimaniwi geriniwi ikwiri ahoainiwise. ¹³ Autaahaatihomi isihya nahatiya kimbihya sangi gaahuraare satawaatopo. ¹⁴ Nini sapi saindi gaapisundataayo: Awaisiho Jisasi Kiraisiho komi gaahandaahi sangi gaahandi kasisati ami Autaahaatiho sangi komi maariho nasanyati ami sahi Autaahaatiho nasamaasihi Kiraisihomihyaatimatohiyihyaatangisi Kindari nepi ahosisami tisamaamaisaihi sahi wo waatapi wonji waanji maaritiwi piwaniwi bimaawise.